

萬曆武功錄

武功錄自序

曩九思殊驚悟典謨虞廷作
堯若舜微但故純王蓋帝者
乃其曰誰敢不讓敢不敬應
亦若自侈其威德者然矧七
旬三危若乃聖乃神乃武乃
文語又必以奄有四海四夷

來王終之者何蓋離大人以
繼明照四方至貴倨矣乃上
九亦必曰王于出征有嘉折
首獲匪其醜然後能重明麗
正得化成天下則前聖長慮
却顧多暇心可相見已或謂
方今重熙累洽而天幸

上又以聖神文武臨況之疑武功
錄可無作恐祇足導人主好
大喜功顧九思所以得就成
此亦大艱難矣歲甲申余不
幸得罪過之不意囚繫武昌
獄以三年久之於法當徙居
庸塞里中父老若親友門人

憐余非罪念余自茲出國西
門外與桑梓且生死辭矣塞
上不毛地慮余或苦困貧窮
餓死塞外不復得還上先人
丘壠乃相率劇金錢得百餘
惠贈余爲塞上歿身計畫已
乃它旁郡邑聞亦多來相餞

送遂天幸得二百金乃買一
妾姚并携兒子甲行赴
闕受遣因搥擊登聞鼓上書
北闕下賴

天子哀憐臣得逡巡未輒發

京師戒嚴余風聲鶴淚慮恐爲
邏卒捕得乃出

帝城西百里許竇德城高叟家止
舍余故有微名東西南北燕
薊青衿士傳聞余在竇德率
遠近裹糧行百餘里畢來受
學余或與談學或與談制義
或與談文章詞賦或與談二
氏或與談經國大業二三子

率鼓掌蹈足謂得未曾有各
人人得所意欲去余乃作一
聯句曰埋沒豐城望霄漢斗
牛龍劍乾坤難合經過薊野
相驪黃牝牡馬羣朝暮將空
高叟乃大書趨刻之令高懸
寶德城樓公卿冠蓋過其地

者多問訊余所在或言在高
叟家多返旆下車見訪若是
者蓋輪蹄相接踵無虛日於
是長安薦紳多盛言九思非
罪久之相國怒亦駸以解丁
丑庚辰余更再伏

闕有

詔下所司行楚中推勘楚當事念
余當出開設驟報卽不得久
畱止中國乃故緩不報以故
余得畱竇德以五載余揣知
難且解乃變易姓氏曰吾陳
姓往往騎一驢或附載大車
中微服入

京師余故無妻孥念里中若旁
郡邑所惠遺我橐中裝無慮
二百金將安所用卽出塞居
庸去

陵寢不百里而近九思馮持

列聖寵靈或不至竟窮餓死黃雲
白草間乃日走禮部前正陽

門外雙塔寺演象所左右從
康王陳李諸書肆窮搜索每
三日必一至至卽移日甚或
至夜分乃去諸書賈殊厭苦
之久之聞六科有存科蓋日
紀載

綸音簿籍余乃從所知交在省中

者購得密登錄之乃執是走
抄報所稽其日全報章設率
與存科合無闕遺乃媿快取
大卮酒飲數升設第闕一疏
必多方謀之四方至七八年
必盡得乃已

京師故重書卽小交際亦必以

一書包裹怕金其內題其刺
曰小書一余念其中或庸有
奇秘書乃屬諸把買從薦紳
家僮奴收買設其家故名家
多書史卽盡令諸把賣持來
余邸中驗問有邊事輒多金
市易之所知交有仕宦在四

方者余必卑懇詞乞其以羗
虜倭蠻名藉事狀幸告詔我
久之幸稍稍多所得第所得
羗若倭朝報事狀以戊子冬
十有一月十四日若辛卯正
月十四日夜盡燬于火自恨
余見時第多讀三蘇語苦才

筆陋惡甚諸所就業無文章
乃市買班馬書以數十親點
竄至十餘每種必別變置法
生剗剝之諸奇字剩語若批
亢擣虛亂趨倒走法舉無不
字模句擬方繆敢操筆札蓋
三閱歲乃幸就次旣就矣余

取自披讀大愧死此何者語
乃敢曰列傳當亟盡投畀烈
燬中已復自念方今水旱屬
頻仍閭閻空竭有司一不戒
諸群不逞若楚劉汝國吳羅
朝廣越丁仕卿閩柯守岳粵
東林道乾西楊秀大梁車宗

孔蜀九絲秦楊戩晉王漢臣
魯侯沐封滇緬旬夜卽安國
亨等率往往陸梁鼓噪如蜩
毛而起島夷播州之役天戈
凡再指而後僅能定之不無
事矣正虞書鋪張舞兩階竄
三危時也九思識慮誠淺小

第所見僅及此以故作茲錄
爲

上五十壽及觀大雅江漢詩頌四
方旣平時靡有爭而未亦歸
本天子萬壽天子萬年其所
頌矢文德洽四國正虞書誕
敷文德舞干羽兩階意也九

思此錄未必非虞書若意旨
倘幸徼

皇上靈寵四方郡國得交付剖劂
或鄉置一部家藏一帙令華
夏蠻貊霜嶠日域傳相告語
則帝光天之下至于海隅蒼
生萬邦黎獻度且盡寒心銷

骨罔復有敢越厥志此卽與
詰戎兵陟禹跡胡異竊妄意
所裨補或亦不甚小夫安可
以導人主好大喜功小之哉
時

萬曆歲在壬子夏五月二十有五
日翰林院添註待詔臣瞿九

思謹序

萬曆武功錄目錄

北直隸

卷之一

西山礦盜齊本數列傳

珠窩礦盜李庸列傳

房山礦民史藉列傳

易州礦民張世才列傳

羅道教侯表列傳

妖僧王鐸列傳

王善列傳

叛民王志孝列傳

京營叛兵列傳

西城響馬列傳

易州響馬列傳

邯鄲響馬列傳

閘河賊陶文列傳

草賊張從敬列傳

饑民王友臣列傳

山東

王登列傳

叛生侯沐封列傳

德平叛民列傳

山西

饑民王漢臣列傳

礦盜王張住列傳

張守清列傳

趙經代列傳

宣大

史二車達鵠列傳

河南

礦盜王西菴塩盜涂四列傳

白蓮教喬濟時刻傳

曾崙列傳

張小村列傳

饑民車宗孔列傳

王自簡列傳

陝西

礦盜楊戩列傳

回夷列傳

茶盜楊四列傳

蒲城曾應禮列傳

囉賊馬有忠列傳

寧夏

哱拜哱承恩列傳

南直隸

卷之二

江賊何旺列傳

李七列傳

海賊嚴大邦列傳

湖賊殷應采列傳

河賊劉朝列傳

合肥強賊列傳

山陽強賊列傳

蘇州強賊列傳

松江強賊列傳

流賊楊儒列傳

崇明鹽徒列傳

江陰鹽徒列傳

楊州饑竈列傳

通州饑竈列傳

饑民姜柰列傳

史存列傳

叛僧省悟列傳

叛民帥嘉謨倪五

趙宗式朱漢卿列傳

叛兵陸文緒傅胎子列傳

馬蹟洋諸倭列傳

爛洪口諸倭列傳

朝鮮梁承貴列傳

浙江

叛兵馬文英何中列傳

叛民丁仕卿列傳

叛生張綺呂協祖列傳

逆賊楊文學列傳

崇德強賊列傳

嘉善強賊列傳

江西

花園洞陶洪李白列傳

建昌諸盜列傳

饑民胡佩三列傳

湖廣

欵人胡國瑞列傳

岔處劉堂艮列傳

草坪苗石募祿列傳

牛角尖大盜列傳

山賊劉汝國列傳

周志棋列傳

叛兵王禮董承恩張鎖兒張勝豪列傳

福建

柯守岳列傳

鎮海龍王宮諸倭列傳

廣東

卷之三

巢賊賴元爵藍一清列傳

嶺東殘寇列傳

巢賊鮑時秀列傳

六灣諸山賊列傳

山賊江月照陳金鶯羅紹清黃高飛許俊美
列傳

海賊林道軋諸良寶林鳳李茂洪老列傳

珠賊陳鏡列傳

蛋賊蘇觀陞周才雄梁本豪列傳

撫民林奇材魏朝儀莫應敷黃瑞劉興策列傳

羅旁徭浪列傳

黎岐列傳

流賊王三唐景松列傳

羅定東山叛兵列傳

惠潮廣丹俄諸倭列傳

廣西

卷之四

府江右江諸獍列傳

懷遠諸獍獍列傳

永寧洛容諸獍列傳

岑溪潘積善諸獍列傳

北三譚公柄河塘韋宋武諸獍列傳

十寨諸獍列傳

馬平韋王朋諸獍列傳

高江諸獍列傳

懷集嚴秀珠諸獍列傳

土吏黃拱聖列傳

山賊楊秀列傳

流賊黎福莊列傳

黃邦緣列傳

叛兵呂子和梁一貴列傳

安南莫茂洽列傳

四川

卷之五

凌霄阿苟列傳

都都寨阿墨列傳

九絲阿大列傳

傀厦諸羗列傳

丟骨人荒沒舌諸羗列傳

白草風村野猪窩諸羗列傳

羅打鼓諸羗列傳

楊柳羗列傳

樹底空撒諸羗列傳

元壩潘咂商巴石紫諸羗列傳

建昌桐檜黑骨諸夷列傳

臙乃列傳

土吏馬應聘馬應龍列傳

土婦奢世統奢世績列傳

叛兵范大龍列傳

叛民瞿旦列傳

播酋

楊應龍上卷

楊應龍中卷

楊應龍下卷

貴州

卷之六

安國亨列傳

安智列傳

奢効忠列傳

妖賊王之佐列傳

苗坪天漂毛吳陞長牛阿田諸苗列傳

也香狗場者亞諸苗列傳

答于鷄賈甲多龍木恰吳老天諸苗列傳

吳國佐石慕太等列傳

彭必信列傳

雲南

鐵鎖箐羅思諸夷列傳

別者電記來阿烟矣先諸苗列傳

緬甸上卷

緬甸中卷

緬甸下卷

羅雄者繼榮列傳

羅雄必六列傳

金騰姚安叛兵列傳

中三邊

卷之七

俺答列傳上

俺答列傳中

卷之八

俺答列傳下

黃台吉列傳

不他失禮沙赤星列傳

捨力克列傳

卷之九

波兒哈都台吉列傳

三娘子列傳

把漢那吉列傳

昆都力哈青把都日洪大哈不慎滿五索滿
五大列傳

永邵卜大成台吉列傳

合羅氣把都兒台吉列傳

哈喇慎着力兔把都兒台吉列傳

哆羅土蠻把都兒黃台吉麥力哥克臭列傳
火落赤列傳

擺腰把都兒兀都打兒漢列傳

東三邊

卷之十

土蠻列傳上

土蠻列傳下

上言台周宰賽兀兒黃台吉額參列傳

土墨台豬列傳

滾兔灰正一克灰正腦毛大小反青列傳

卷之十一

王台列傳

虎兒罕猛骨孛羅康古六反商溫姐列傳

逞加奴仰加奴列傳

上寨那林字羅列傳

王兀堂趙鎖羅骨列傳

奴兒哈赤列傳

王杲列傳

阿台阿海阿革來力紅列傳

卷之十二

速把亥列傳

上言兔上言把都兒列傳

炒花花大列傳

老撒卜兒艾列傳

卷之十三

黑石炭列傳

大委正列傳

煖兔拱兔列傳

委正列傳

伯言列傳

董狐狸兀魯思罕長昂列傳

猛可真小阿卜戶列傳

大嬖只炒蠻列傳

赶兎創布列傳

西三邊

卷之十四

吉能把都兒黃台吉隱布台吉銀錠台吉威
正恰把不能土昧阿不害卜失兔阿不害俺
墜兔虎來罕同阿只兔滿金台吉列傳

卑不利阿不害把都兒拓不能阿拜戶拓不
能禿退台吉阿計大台吉哈漢把都兒台吉
圪塔台吉把禿台吉歪利台吉寨葉拓不能
沙計阿不害沙計台吉討太把都兒耽戴捨
吉列傳

切盡黃台吉切盡妣吉本的大那木反台吉
滿克素阿不害碑馬兔阿不害阿着兔阿不
害折答答阿不害滾吉阿不害打正台吉丑
氣把都兒白馬台吉成把都兒苦素阿不害
脫計阿不害打刺克漢阿不害列傳

明愛台吉切盡罕同列傳

莊禿賴孟格台吉麟素兒拈不能列傳
炒忽兒卜打什台吉列傳

或收氣黃台吉捨刺乞捺通化列傳

萬曆武功錄目錄終

萬曆武功錄卷之一

翰林院添註待詔瞿九思纂

兩京

北直隸

西山硃窩房山易州諸礦盜列傳

齊本數西山礦盜也。先是守備茨溝者吏唐繼武詳言兩臺欲以銀河諸流民產沒官。以一軍軍黃土溝。一軍軍愁腸寺。禁商賈往來。懼礦徒而礦徒杜天質等倉卒聞之。皆惶懼。計廼歛金錢數百串。送奉繼武求解免。於是備兵使劉世昌請於部使者丁惟寧。因

劾奏其事。是歲萬曆癸酉也。居七八年辛巳西山齊本數偃起阻山公行官兵湯應科等殊疾力戰不克而死。本數竟遂逃走旁近郡於是乎把總陳經翰及何明李沛皆罪至不可赦矣。而保定臺御史辛自修御史李棟請數其罪。事下大司馬梁夢龍覆奏。上有詔。罰陳經翰。何明。俸凡六月。李沛凡三月。按茨溝西連繁峙。東按倒馬。而西山畿輔重地也。廼於洞口築臺益列亭障而守矣。

李庸。硃窩村礦盜也。所居在渾河高山之間。常私置爐冶。化礦砂以爲金。而山人王用恐事覺。勢必染已。

廼走宛平。微告東廠中貴人馮保。而會守備楊正蒙
適旁郡。卽與千總劉喬及巡徼吏宛進忠提邏卒薛
萬成等往捕。旣行至渾河。庸先已鳴金鼓聚衆。執弓
矢。戎兵皆緣河而待矣。庸等唯恕我兵度河弗可免。
竝灣弓鄉我兵。矢下如雨。而保亦恕我兵中流矢。趨
馬首還。卽以書請於上。詔兩臺備兵使逮捕。而是
時臺御史吳允。御史敖鯤。方檄備兵使顧袞捕。未獲。
以故久不報。有頃。詔書至。而庸等二十五人悉已
就縛矣。廼以李庸等五人適邊。李自得及李萬海等
二十人皆輕重罰治。屬臺御史以疏請。是歲萬曆辛

已也。而珠窩村去京師可二百里。宛平去昌鎮可四十里。大司馬梁夢龍抱根本之慮。專欲嚴保甲法。於是以宛平簿李宗廉馳村中也。

水峒兒及朱家山水峪山長嶺湯哥庄皆房山所部也。常產礦砂。可化以爲金。嘉靖初邑人王宣請開季輸課凡三百六十金。後以礦閉報罷。癸未甲申之間。礦砂復生。居民群輩入山中盜竊。日至千餘斤。大率砂一斤金不啻一錢也。於是房山人史藉等以爲利廣而爭奪者又盛。唯恐禍發不淺。廼上書請比故事。先是嘉靖中。蓋州歸州皆產礦。而曾遼東衛軍餘姜

賢以其事奏。頃咨苑馬卿。卽以賢爲礦長。屬縣道監之。而以所得金聽民取什六。而它一切封輸府庫。悉以佐邊。而是時。楚雄亦開礦。上有詔。歲貢三萬兩。因著爲令。今行之三十餘載。亦旣有效矣。而今者。方建慈寧宮。萬壽宮。山川效靈。產金藉唯。是敢以死請。竊比於姜賢之後。因效尺寸之利於國家可乎。

上有詔。詔兩臺問狀。於是涿州守王道定。及宛平令朱滾。涑水令孫衮。躬馳洞所。見山勢險隘。盜賊易藏。議以爲不便。遂寢。明年。涿州人史錦。復奏礦徒隗大海。隗大朝等。匿稞。送奉縣令馬永亨。公行開盜。而永

亨亦上書深辯其寃。是時兩臺收捕史錦急。錦與郭夏竟遠逃。不可得也。僅得康世貴等四人。前是山西黃安鎮流賊石賓亦至水峒盜礦。會邏卒追逐。自相騰踐。跌傾山澗者數人。錦皆奏以爲爭礦而死。寃哉。誣之也。是後竟以永亨加府同知。秩視事如初。而死平丞閔汝乾亦兼視西山礦事。歲時與房山官兵皆巡徼峒中。而令壩州道得察其勤惰而進退之也。周言。張世才皆易州人也。庚寅歲大饑。上虛帑金數千萬。以佐百姓之急。而周言廼乘是時上書。請比開採。而御史邵以仁深言其不可。明年春。張世才復

請於上皆下所司問狀。而是時易州有孤山之礦。長嶺之礦。烟董崖之礦。黃土溝之礦。大曹之礦。柳樹溝之礦。牛心洞之礦。桃樹霍之礦。阜平有秋波之礦。房山有水洞之礦。言以爲常見光閃鑠而世才亦以爲天獻礦銀以資陛下。先是肅皇帝從薊州人李昇。嵩縣人刁勝。請遣中貴人崔閔及千戶仝爵往薊主事。沈應乾及千戶李鉉往嵩。居一二年。薊進金二十萬。嵩進金三十萬。以故言得請以爲比乎。始兩臺因劉儒奏議以爲礦。旁近祖陵於開不便。於是世才書大略言孤山秋波去祖陵五六百里斷絕。

居庸紫荊倒馬三關。鳥能渡渾河。而洩地靈乎。而獨水峒至。祖陵百餘里。則其它煤鑿石焚灰者。日月相屬。皆不聞有妨。而獨以爲有妨於礦。臣未見其可也。唯陛下財察幸甚。曩者廣昌靈丘諸礦。卽今所爲孤山太安烟董崖呂家庄黃土溝也。

讚曰

太史公讀孟子書。至梁惠王問何以利吾國。未嘗不發而嘆也。曰。嗟乎。利誠亂之始也。邵御史倘亦有此意乎。不然。礦亦天地之利也。而以之助邊。顧不善與。孔子曰。放于利而行。多怨。假令西山珠窩及房易之。

聞採礦之使一旦四出則必竭府庫起爭競釀無窮之禍曷勝道哉。

羅道教侯表列傳

侯表魚臺人也。常與金鄉鉅野南皮人。群輩數千。誦羅道五部六經。於是分爲三千餘社。每社立社長一人。社舉一人。社出金一分。封輸社長。諸社一旦有緩急。不能辦。卽以社金。之。人人皆以羅道教利賴已。廼益尊崇表。殆如神明矣。而諸社皆大言。太古屬上元金輪王掌教。每歲凡三十六月。甲子凡一百八十已。改屬中元燃燈佛掌教。歲損十二月。甲子凡六十已。改屬下元釋加佛。歲又損十二月。甲子亦如之。周有三十六王。三十六佛是也。漢有二十四帝。二十四

孝是也。唐有十八帝。十八羅漢是也。宋有九朝九曜星官是也。朱有十二圓覺。今當屬表。其爲謫恠不經類如此。而是時。魯府鎮國將軍。亦執弟子禮。東鄉坐。表師事矣。居頃之。表著書。自言十二圓覺出世書。秘不載。第以授記室王禹書成。分爲三卷。令崔穩鐸日夜裝。因獻見於上。而會有大婚禮。低徊者久之。還歸魚臺。明年。大婚旣舉。鎮國將軍。即使使者李洪王治。一介行李。亟告表。表趨穩鐸往長安。旣至。卽奉書直走西安門。欲以其書伏闕下。於是邏卒執之。告於東廠中貴人馮保。廼以書奏。詔執金吾逮捕。就

法司於是檄魚臺收捕侯表等。盡繫獄以示左道惑衆者殺毋赦。

讚曰

北方獨多羅道教乎。然其教與白蓮相爲上下。久之遂至爲不軌亂矣。語曰。獻爲三群。而況群數千衆。殺牲鼓舞。日務神鬼。安在其不亂也。方是之時。南方尤尚白蓮教哉。孟子曰。我亦欲正人心。息邪詭。詎詖行。放淫辭。豈謂此與。

叛僧王鐸如燈王善列傳

王鐸武清人也。爲兒時從比丘知惠所。削髮爲僧。久之。請謝絕惠去。復爲氓。而是時林福以妖言惑四方。亡命甚有聲譽。鐸因執弟子禮。事福而會福被逮。庾死獄中。又去。去爲武城中衛舍餘。鐸爲人性罷。專好大言。少成事。背左有疤痕一片似半月。背下有七白子。似七星。腿上又有三烏子。行間道逢雷蠻子至。覩其面貌竊奇異之。因爲歌以別。歌曰。南道裡頭樹中剛。掩身王禪方顯名。下有三烏子。三陽頂上生。左背縣月明。遍身滿天星。要知家住處。倉圍方近尋。里中

由此號鐸爲王禪矣。自是之後，蔡鎮、劉佐、李倉等皆從鐸遊。鐸卽立爲三十六傳頭，招致衆姓爲會。或三二百人或五四百人。是時鐸衆固已五千餘矣。鐸廼與諸會約，約人出金五錢給筭，筭所書卽雷蠻子歌也。詳言此屬孫臏留下，於是引其衆走房山、小西天、石經寺，創起巍閣。閣上以銅三百斤造彌勒佛一座。佛後大書赤髮僧人王鐸，已置蓮花瓣三千六百瓣。每瓣佛一尊，已置龕五百，每龕佛亦如之，已置小石牌一座，已又置石牌二座，其一座大書天地三陽會，首王鐸，它皆衆男女名姓，已造三陽殿一座，中座混

元主佛三尊。傍列三十六天將。是日鐸自稱鬼谷王。禪三陽老祖。卽封蔡鎮。張坤。劉保等。三十六人爲三。十六天將。將與磁香爐一副。曰。若等自此神矣。已。鐸。廼著妖書名曰。鬼谷王禪度赴龍華寶卷二本。書詞。多譏諱謫怪。不可解曉。弗載。是歲萬曆己卯也。張坤。見黨與日增。恐事覺。事必染已。莫若自請於東司房。因得除罪。可乎。有頃。坤果至東司房。具以實告。卽使。旂校趙賓等。逮捕鐸等就吏。復使使者疏獲妖書。及。違法諸什物。亡笑。東司房因劾奏其事。事下鎮撫使。鞫問。辭服。上有詔。詔大司寇擬罪。而復申之曰。近。

來遊食邪妄之徒。專一捏造妖言。煽惑愚民。燒香會衆。好生敗俗釀患。今嚴加禁緝驅逐。於是四方郡國。皆奉行。詔書惟謹也。

如燈亦妖僧也。嘉靖中。常從西安門。詳言募修鎮國寺寶塔。因爲妖言。蠱惑人心。欲藉以爲姦事。覺爲執金吾所捕。廼以檻車膠致原貫。旣行。至保定。乘使者隙。因遂逃走。久之。復與其徒妙通。妙興。至東城觀音寺。已移居真武廟。建爐冶。自稱身前故魏徵蒼頭也。帶銅千斤。欲鑄玉皇像三尊。已。又言修五臺山塔。廼自持木鈴。號召國中。國中多有從燈遊者矣。燈益爲

妖言言事佛。可以懺罪徼福。燈由此獲金錢至盈橐。數數然也。於是巡城者吏執之以請。上廼謂京城內外遊食僧徒過多。奸幻百端。殊爲蠹民。甚亂法。詔大司寇禁諭。於是執金吾榜掠燈一百。妙通妙興皆六十以上所自定也。

王善。別號後溪。東明人也。先是考城朱道士。藏有妖書。及天師斬鬼印。善因從之遊。盡得其術。於是以斬鬼術。遊行郡邑間。而會儀封人楊廷友。新城人曹倫。聞善精於黃白。竝詣善。善與之語。一語連日夜不倦。遂迎善至其家。治黃白。久之。倫復師事。祥符人李相。

相尤精於金蟬也。其法亦立會。會或百餘人。以子午卯酉日。衣冠洗。擊鼓膜拜而禮四方。是時睢州人趙守榮能相。廼言相倫之面。貴乃不可言。而善尤精日者。亦稱乙未年。庚辰月。己未日。乙丑時。倫其興乎。其所期許倫。皆侯王天子事。類如此。居頃之。會中遂拜倫爲南岩祖師。而倫亦立。吳大剛。楊廷友。侯守玉。三人爲大頭領。已立鐘杲。谷世平等。一十三人爲小頭領。已南岩。暗號朝廷。大頭領。暗號三公。小頭領。暗號指揮也。於是大頭領。每一頭領。一百八十人。小頭領。每一頭領。四五十人。勃勃然欲反。皆有狀。而爲儀封。

諸邏卒所覺。卽請於令長收捕楊廷友。加以三木。倫
廼怒。至髮上指冠。計欲擊破城走。而是時縣新行列
兵。傳箭法嚴。弗克就。有頃。倫廼治葛巾。紗衫。綾靴。及
寶劍。玉帶。巾尚黃。服尚白。旂志皆五色。亟使使者鍾
臬谷世平詣善期。至朱家所。椎牛築壇場。欲拜善爲
兵師。善亦使妻舅呂朝聘先往。而倫大梁事覺矣。先
是倫以白蓮教惑大梁。法當梟斬。邏卒故知善。倫黨
也。遂執善。疏捕善。天師僞印。邪書。圖書。咒符。到縣庭。
是日卽請於備兵使胡維新。屬大名王同知。順德陳
司理。問狀。皆叩頭服實有之。而適大盜侯守良聚黨。

數百人舉火專焚人室屋行間恐道上疆奪之。廼使諸邏率以篋輿膠善致大梁。周臺御史所雜問。而是時縣道皆謂不宜以往。周御史曰不然。事發本大梁。而況何莫非王事。奈何以它省視乎。於是保定臺御史張鹵以其事請。始善就吏時臺御史方簡兵大名也。

讚曰

河以南北多信曰。蓮教率以此敗也。異哉。以余所聞京師人。人無女男。皆立會焚香。動以數百數。而其甚有鳴金鼓張旂志。黃屋左纛。膜拜而呼佛。洋洋盈耳。

乎。上有詔禁燒香會衆者。欽哉。孔子曰。攻乎異端。斯害也已。鐸等豈未聞與。

叛民王志孝列傳

王志孝。長安人也。好黃白之術。萬曆初。邑中子蔣宗智。常從孝遊。欲習其術。孝與之煉母。燒砂。築壇魔斗。由此傾動長安。孝既見長安從遊者衆。遂勃勃然欲反曰。人言丈夫生不五鼎食。死卽五鼎烹。豈欺我乎。於是與宗智。陳鳳。張妙山等約。吾當稱帝。若佐我。我拜若爲侯王也。宗智對曰。願盡力。是日卽築壇塲。造符篆。志孝儼然稱帝。而封宗智爲王。妻梅爲后。而陳鳳。劉騰。王玉。張妙山。王祿。趙俊。張鎮。畢受。僞職。計將欲大舉。有萌芽。而爲執金吾傅霖所覺。卽使使者逮

捕以請。詔鎮撫使卽訊志孝等辭服。於是鎮撫使覆奏以志孝等下法司。而拜傅霖爵二級。官校一級。先是給諫鄭岳亦上書奏事。大略以王金劉文彬事爲明鑑也。

讚曰

莊皇帝初。王金以丹石符呪。狂惑群輩。卒廼從末滅。亡恙乎。今上初卽位。志孝廼亦以黃白事。稱亂哉。語曰。前車之覆。後車之戒。夫以此禍人。猶爲不可。而況於爲不軌乎。悲夫。毋爲禍首。反受其咎。豈不信哉。

京營叛兵列傳

京營諸官軍其主從竟不可考也。先是少卿曾軫亨閱視雲中既還。上疏條對裁冗員。長安傳以爲請。抑損營中諸廢閑者吏俸。及戍卒停操者稟食。於是金吾指揮使高濤。旂手指揮使楊紹臣。羽林指揮使高一椿。請於大司馬石星已。請於定國公徐文壁。柰何欲紛更。祖制而以我爲老耄廢閑而議罷乎。願爲畫便計。不然吾等且日自言於曾司空所矣。大司馬曰何有是。誰爲爲此議。而令若等擾攘亡已也。亟去。毋妄言。妄言誅矣。頃之武選郎張國璽聞官軍皆

攘臂而起。請以檄曉譬之。趨毋亂。諸衛官及戍卒。固不知檄意也。乃聚黨數百人走。長安門。欲匍匐悲號於元輔。而會大司空曾同享。左司空周世選。右司空盧維禎。詣會極門。上疏。諸官軍望見大司空來。皆趨而前。遮道稱願。母減俸不容口。遂擁衆直從司空走承天門。臺隸呵止官軍。官軍擊砂石。傷臺隸面貌。濺汚井及司空。以司空親乾亨兄也。賴大司馬危言。始解散。於是給諫羅棟。御史顧龍徵。皆劾。奏其事。而大司馬。大司空亦請告以謝人言。上弗從。獨問五府及京營兵科。自是之後。給諫章尚學。則劾張國。

璽 詔調南京用。亦罰俸凡六月。給諫鍾羽正吳之
佳。御史賈希夷則劾定國公。以定國公所題誤也。先
是 上有詔。詔所司問狀。大略言。如有意縱容。互推
諉。不行禁戢。令指名叅奏。而左司寇邵陛所訊指揮
張佑。百戶李山。李欽。晏文。四人。而其間獨一李欽可
鞫。張佑則已老。山與文皆貧甚。故無糧。而王維政劉
豸。則并其名而亡之矣。凡此皆定國公所 奏題於
是 詔罰俸凡六月。而大司馬竟請論。高。清。楊紹臣。
高一椿。如法曩者。常止三人。毋妄言。而三人自言吾
等旦日請於曾司空所也。

讚曰

禮不敢齒君之路馬。而況於尚書乎。以余所聞。尚書國之喉舌也。禁門咫尺。天威而武弁蒼頭。奈何以不法施之。倘亦有蕃鎮之漸乎。晁錯常有言。削之其禍速而小。不削其禍遲而大。豈獨七國哉。蓋亦類今之兵勢然也。

西城易州邯鄲通州諸響馬盜列傳

孟子龍五軍八營。戍卒也。乙亥歲與留守軍黃梅騰驤軍宋朝陽。專騎官馬。馬上灣弓而射。人人至奪其金。走走如蜚。八九載之間。道路弗寧。疆吏第知其爲響馬賊也。姓名弗可聞。甲申夏。朝天宮人尹承恩偕騾夫閔科。從定興販錢。旣還。行至羊房店。子龍三人皆揚揚騎馬。貫弓矢而來。廬承恩奮髯據鞍曰。走速送奉錢馬上。承恩卽取橐中裝。跪而奉曰。錢盡在是。唯將軍無僂我龍等。竟欲殺之以滅口。而會煤夫數十人至。弗殺。復騎馬向德勝門走。於是以其錢。旦莫

從博徒賣漿者。遊乎。而是時。指揮使曹大義。趙東魯。有才名。頗能逐捕盜賊。廼使邏卒。劉江。巡徼道上。而子龍等三人。方右持杯。左挾歌兒。大自嫵快也。江等偵其狀。請於大義。即使使者捕之。疏索橐中。姦藏僅遺錢一萬二千七百文。馬八匹。及刀箭衣服亡筭。是日召致承恩公庭中對簿。子龍三人皆叩頭服。實有之。頃大義復捕獲王章。章亦大盜也。而御史葉承遇見以爲新法。兵馬使獲強盜三人者。具題紀錄。廼以曹大義請比兵馬王克敏。趙東魯例也。上可之。易州故多嚮馬盜也。壬申冬。信陽司訓徐篤敬還自

長安。旣行。行未至滿城。而會一強賊騎。棗騾馬。執弩矢。鄉司訓發七矢皆中。奪其橐中裝而去。旦日。司訓竟死於道。縣道爲治楊柑。先是。備兵使高文薦。徵保定同知李琮。都護王江。指揮劉光。代行保甲法。而滿城令申九峯。亦帥縣尉黃履經。旦莫巡徼道上。至備平。而嚮馬特出。諸邏卒不意耳。於是縣令移臺御史宋纁。御史盧明章。有頃。兩臺上書請量治高文薦。欲逮問王江等。上初從廷臣議。凡大寧都護所部。有如盜賊公負。聽所在捕繫。歲終。保定臺御史得察其勤否。而舉刺之。是時。大寧以都護一人。保定以同知

一人主巡徼事。而安新傳蠡東鹿。則以屬之縣道也。縣道有盜賊聚黨至十人以上者。所司皆請論如法。李經。榆林衛軍餘也。戊寅秋。常與王貢。高大深。約響馬盜楊文材。孫得寶等。相扇而起。而是時。百戶王虎。亦竄入其中。竝走邯鄲。白晝大道之中。騎馬灣弓。奪道一介行李。往來如入無人之境。是時。彰德守蒼頭黃謙。道逢經。經呵而止之曰。安走。謙廼下馬。盡以橐中裝送奉經。經復携所鹵獲。卽騎馬走。而廝卒栗洪貴。往縣庭中。具以實告。於是縣令李廷彥。尉王節。及獄吏郭邦憲。永年尉陳廷棟。肥鄉尉師珩。卽提邏卒。

許輅。蔡敖等五十餘人。追亡逐北。至暴台寺。挑戰。經
廼貫弓執矢。鄉賀逢源射中馬。節亦射經中鬢。左經
復走。永年牛家堡。乃益張弓射。射果精。我兵張登等
中流矢。死者三十餘人。節與李獻奮焉而前。勇氣益
百倍。於是疾力。獻劒斬楊文材。節斬高大深。生得李
經。而縣令及同知趙于敏。捉邏卒。圍者四面。而郭邦
憲。陳廷棟。與蔡考。李光先。竝衝鋒而入。得王虎。王貴。
張再傳。盡斬之。而獨以李經。孫世寶。檻車膠致廣平
府。繫獄。是日。卽請大名姜副憲。屬趙同知王司理。鞠
問。辭服。自是之後。鞏昌張豹兒。與閔子新。毛喜。喜等。

十餘人。大會通州竹佛寺。欲爲李經。滿雪前日之憤。子新。廼王虎餘黨也。於是使豹兒。潛伏邯鄲呂公墳。訶事而爲李獻所覺。卽逮捕之。就吏。然後請於臺御史張鹵。御史王應吉。書奏。事下大司馬方逢時。議以縣令李廷彥。尉王節。紀錄。初趙于敏。守河州。以上城工不實。貶俸二級。至是請于敏俸。上皆可之。曩者王虎。故以延安衛百戶。常備守疆場。今廼淪於大盜。議罷曩也。

通州亦多響馬盜也。甲申冬。淮安鈔關法當進鈔七十四萬。鋪墊金二百兩。屬繇使李桐。旣行至通州海。

子窪而會響馬盜。要而盡奪之。邏卒日巡徼道上。賊
率不可得。而是時中貴人張誠以巡視庫藏一聞斯
事。卽上書以請。大略以爲曩時臺諫諸臣所條對捕
盜法。至備而後御史陳荐請暫賜緩刑。漸稍習於
寬和也。今宜著爲令。令所在大盜毋得妄稱逃脫。輕
易註銷。苟完考成。上可之。於是捕盜之綱益密矣。

讚曰

軍餘所以備它盜也。而百戶尤爲鎖鑰。今白晝能騎
馬灣弓而殺人者。皆此屬乎。余嘗由西城還走易州。
通州見其下。冠蓋相望。而獨患苦響馬。殆倔强哉。練
武力業。

保甲。列亭障。法不可不謂嚴。嗟乎。響馬勿爲志。此皆北走長安道也。

開河賊陶文列傳

陶文運河盜也。萬曆初，千戶安國轉輕賁銀一千九百七十餘金往太倉。既行，至七級下閘，會莫諸船，皆止舍，而大盜陶文趙三等訶知舟官，舟多金錢，夜半擁衆四五十人入舟，執陶，肉而奪之金。於是河上諸臣工皆大懼，奈何以巡徼不法而使府庫金中道而散於諸偷乎？吾等度自知有死罪，誠惶恐而又久遮留使者，罪益深。且日卽貸金如數，悉付使者，然後告於備兵使王元敬。於是臺御史傅希摯、御史張憲翔竝以其書報上。是時給諫蔡汝賢則劾奏備

兵使王元敬。袁州守游季勲。御史商爲正。則劾奏
通判孫仲科。縣令李廕。永謝湘。事皆下大司馬譚綸
覆奏。上有詔。罰游季勲。俸凡半載。王元敬住俸。而
以孫仲科等。屬御史逮問。居一二年。備兵使曹當勉
始捕獲大盜陶文等。以告。於是御史劉良弼具報
天子曰。今臣所捕。迺曩時鬧河盜也。詔梟斬河上
使大盜母效陶文。

讚曰

以余所聞。曹濮之間。列兵憲。儼然大將軍。旗鼓豈不
壯與。區區一陶文。何足以辱府庫金。而勞苦我河上。

公平。主計者常請選補運軍。良是余觀閘河甚狹小。
非若海洋江漢而廣也。何廼憂盜賊哉。

草賊張從敬列傳

張從敬廣宗人也。常與邑中子董談及鉅鹿人董魁陽。衡水人蕭茂林等二十餘人。竝方巾綠服。如漢官儀。白晝執持斧鉞諸鬪器。皆揚揚騎馬。馳驅於鵝侯臺旁。若無疆吏乎。於是寧普令孫訓。新河令莊傑。及冀州守張存鉅。請於井陘備兵使喬木。竝提邏卒邊希真等。追逐至東鹿。東鹿迤南。則王家井。迤北。則聶家莊。迤東。則穆家窪。諸偷獨從間道走。走不犯東南界。而希真及韓署等。鳴金鼓。號召鄉兵。殊死力。鏖戰斬首捕虜凡四級。奪獲馬駝及弓矢。而諸偷亦殺我

邏卒耿介韓署韓計年相當然後走新河曹家庄道
逢東鹿人王喜之劉克類劉天佑携橐中裝往曲周
執而奪之已走鉅鹿于家小留諸庄淫婦女略信惟
德李惟正陳其平董守恭等金銀什物亡筭賴縣令
何文極尉孫孟春逐捕始解散當是時鉅鹿則屬大
名僭兵使東鹿則屬易州僭兵使新河則屬井陘僭
兵使乃竝請於保定臺御史陰武卿御史敖鯤范鳴
謙是日卽檄巡徼真定同知徐濂順德同知李琮保
定俸侯奭竝行部三縣竟未得賊也於是兩臺及給
諫張昇思後先劾 奏諸疆吏於郡守則王守誠魏

任張振先於縣令。則何文極。王明。莊傑。於尉。則張孟春。武仕侯。君輔。事皆下大司馬梁孟龍問狀。時壬午夏也。居頃之。大司馬覆奏。上有詔。住何文極。李琮。

張孟春。俸罰徐濂。及莊傑。俸。凡三月。而備兵使曹子登。上幸寬假不深治。先是東鹿令王明。調任丘張給諫疏。必欲明捕獲盜賊而後往也。居頃之。從敬等。流山東。廼與孫夏志謀。以爲縣道。必不寬假我輩。若不蚤爲地。則相隨就縛矣。於是以一百二十金。悉付夏志買馬。期五月終。大舉流行諸郡邑。豈不愉快乎。是日從敬亦由穆家口。直走太安州。安家庄。亡匿。

村民并奎所。侯夏志騎馬。猶恐時且久。此間人必深疑我。我不若先未發娶妻也。示吾母它意。廼以王勉爲媒。娶其妻趙。當是時。山東臺御史楊俊民及御史黃應坤。先已察其流犯諸郡邑人。檄濟南武德臨清曹濮諸縣道收捕急。於是平陰令微請於濟南備兵。使劉天衢。即使都護任自強。千戶馬尚文。馳安家庄。從敬廼帥董談等。竝騎馬。跳驅而前。自強不避矢石。疾力戰。竟執從敬。董談等七人。餘黨皆遂逃已。禹城執李舜卿。肥城執李天民。竝檻車膠致公庭中。對簿皆有左驗。於是兩臺請於上。幸從大司馬議。梟斬。

張從敬等傳首井陘間。

譜曰

兩鹿及新河。豈非畿輔股肱郡哉。余聞其下。列郵亭。練保田。兩臺詳哉。其言之也。今草寇不下二十人。而以二三守。若令敵戰。廼致耿介等。傷金夷而死也。悲夫。張從敬。竟爲山東所捕。首足異處。倘所謂天道好還。是耶。非耶。

饑民王友臣列傳

王友臣內黃人也。縣故旁近湯陰安陽。而限以漳河。乎丙戌歲大饑。村落間。固鹿空虛。百姓不厭糟糠。而賈人皆轉麥以逐利。母皇它問也。於是榜人李友才。以麥舟七艘。鼓行而道豆公村。而會王友臣。聚安陽湯陰諸饑民數千人。鳴金鼓。張旂志。並鼓噪而前曰。毋往。亟取麥來。方是時。我困。恐不能須臾待也。而邏卒申廷諫。乃趨而呵止之。友臣卽劒斬諫。以懼諸賈人。竟盡奪其麥而去。而會淇縣有王安之盜。汲縣有車小岡之盜。皆以奪麥爲務。於是旁近郡。皆提邏卒。

逐盜賊。遂捕友臣。并及安。先是安在鳳凰臺。樹藍幟。鳴金。略賈人。張學書。而小岡亦略趙國英。賴永。湯克寬。久之。二酋皆伏誅。獨小岡未禽也。其後御史柯挺條對救荒諸便宜。而臺御史賈三近以爲挺有所刺譏。迺上書請告。以避賢者路。上不從。以爲撫臣受朝廷重寄。當以災傷爲急。豈可以言語疑似。悻悻求去。於是臺御史叩頭奉詔書。惟謹。復北鄉拜。且曰。第使災民亡恙。然後足以報塞。陛下明德也。

讚曰

以余所聞。賈公念饑民。念至深。唯恐升斗之粟稍闕。

滯使九重德意不旦莫及也。而饑民卒賴以生活。亦甚盛矣哉。人言救荒無奇策。豈其然乎。豈其然乎。余每讀故志。至聖人貴未然之防。則未嘗不以爲通於積貯之說也。

山東

王登列傳

王登東昌人也。與邑中子黃恩、李茂禎、董明池善。居恒謀欲反。會丙戌星變。歲大旱。登等相與謀曰：「以此時起可乎？」於是黃恩專以左道惑里中。而明池乃爲檄檄大書軍情。密東卽付梓人雕之。已復書群英聚會代天行道於上。廼以檄請登。登以硃紅標之。先是茂禎日夜治闢器。闢器已成。是時十二月將盡也。登等乃乘太守帥官吏並出郭迎春。謀欲略府庫。及運舟諸糗糧事覺。爲邏卒所捕。生得王登等八人。奪獲

刻檄及兵器。餘黨皆解散。明年春郡守蕭應宮以請。於是都御史李戴會御史毛在奏。聞事下戊部。是時少司馬石星本兵柄。乃以其事奏。詔梟斬王登等。東昌市居二三月。復按聊城令韓子廉肥城令閻談。後先逮捕黃恩。王應時。王堯臣等數十人。罪當斬。上可之。廼以萬象春。田樂義。劉魯。蕭應宮。下銓部紀錄。先是試御史王象蒙上書。欲曹州建守備一人。武定調守備一人。濟南改叅將一人。大略以曹州去徐沛近。去省遠。地形最利。長驅自昔。號稱曹單多妖民。而武定東臨渤海。僻在一隅。多流賊故也。曹州故有

兵二千八。建守備便。武定調德州遊擊往亦便。濟南故有練兵叅將。後罷。今于都使司改叅將一人給與勅諭統領訓練亦便。上從少司馬請以爲議是。

讀曰

余觀東昌南至曹濮北至臨德皆餽道。豈非天下咽喉乎。其下地四平曠。柰何不請大將以備之也。而說者曰。兵巡使儼然建大將軍旗鼓矣。余以爲不然。運籌帷幄之中。將不如兵。巡使攻城先登陷陣卻敵前蒙矢矢不避湯火之難。兵巡使不如將。二者曷可廢哉。易稱履霜堅冰。至余每讀王御史疏則未嘗不爽。

武切錄

八三聖列傳

十一

十九廿二

然自失也

叛生侯沐封列傳

侯沐封文登諸生也縣故有土城歲久崩於是議建石城會劉太守以庚辰朝正月還郡時冉冉正月矣先是當事者以其事屬同知韓屏屏廼召諸父老子弟約約治城大率二百一十餘日日人稟食二分官與民各辦費費亡慮一千一百餘金槩不得論優免是月也屏行部文登與海州吏目孫經尉陳思義以二十九日始事而諸生侯沐封等例當轉石塊殊鞅鞅不樂也會諸生唐希孔軍餘于教礦徒榮紀亦欲阻此法沐封因與謀曰奈何以吾輩下同編氓乎今

請免不可得。必聚衆直走公館。鼓噪發彼姦臧。然後可圖也。希孔曰。吾意亦欲如是。卽帥百餘人。人各持木棍。鋤鎗。擁衆往問屏。沐封曰。所不趨而前者。有如此日。封前。希孔亦前。因言縣尉驗石過刻。公獨不能以半辭禁阻之。安在其爲大父母也。我等貧困甚。卽賣子鬻產。以運石。猶不足。若不爲我畫便計。我惟有死頃。沐封恐爲屏所窺識。廼退處。諸生後。陰使叢相等亂飛石。擊屏中屏身。於是經及思義皆跳驅走。獨執陳把總毆傷左股。是時丁同知行縣事。後趨走至工所。柳邦麟等誤以爲屏也。復飛石擊紗帽裂碎。後

乃知其非屏也已。于教疆要挾府出示。自日中至曉。擾攘震城中。府不得已。果以檄趨散工。始解散頃之屏廼以其事告於副觀察袁弘德。城事竟寬。假至秋杪。於是撫巡使趙及御史陳功。譙讓督學使者沐封。免諸生爲民。唐希孔王好賢劉文輔發社廼奏聞。事下御史大夫陳炯。皆寬韓屏等罪。獨沐封于教。當適邊。叢相等皆枷楔以爲叛民戒。詔從之。於是軍法榜掠沐封凡一百。而後遣也。

讚曰

城池所以衛民。沐封以運石之私圖。遂妄欲阻大計。

何哉。至其傷郡佐。毀冠裳。此尤非疆場之福。傳曰。鄙人何知仁義。鄉其利者爲有德。封等豈亦有之。當是時。非深憚趙公威望。方以王佐材保釐其地。若等且將爲戎下禍。不但止此矣。

德平判民列傳

德平濟南所部也辛卯歲大旱蝗蝻爲災是時崔士
棨爲令廼移于臺御史宋應昌曰縣不幸良苗敗於
蝗虫之口願爲縣畫便計先是縣以大旱請臺御史
見旱蝗相因而起心竊數數然疑之而會丞董用賓
至臺御史廼進用賓庭中間狀用賓具言有之第不
如是其甚也是日士棨亦至廼報夏災竟如所請臺
御史卽召用賓置對士棨爭辯不容口有頃縣遂聚
衆至五千餘人直走臺御史所揚揚由甬道而馳廼
特敗禾及死蝗陳堂上曰我明府所請如何臺御史

皆一切寬假之。使其自定。然後具以實告。先是濟南
守及糧使者。荊州俊。大方伯。傳作雨。案驗皆言。德平
實旱災五分以上。百姓見臺御史最明察。叩頭服實。
吾等小人爭時急。殊觸犯天威。於是臺御史劾奏崔
士傑。父之。給諫王德完上書言所劾未當。詔部院
問狀。其後御史大夫李世達覆議。詔曰。近來議論
煩雜。假公濟私甚多。卿等宜辨別人心。力持國邪。其
有邪佞險薄之徒。沽名飾行之輩。逞臆妄言。遵奉綸
音。指實糾奏。而給諫吳鴻功亦言。邇來下吏可厭。扶
上官訛言。可以宣內地。虛名可以動聽聞。上甚嘉

之頃臺御史宋應昌請予告以謝人言大略謂德平之變實荊州俊主之語在奏疏先是御史何出光舉士柴卓異乍賢乍不賢廷議以此紛紛矣

讚曰

王成豈非西京循吏哉迺亦虛增戶口乎德平之役起於愛民太甚臺御史亦第論其報勘不實耳而給諫則不得不爲紀綱惜且以五千之德平揚揚旌聲垂而走會城甚矣哉欲以敝履而加首也悲夫孔子曰名不正則言不順信哉是言也

山西

饑民王漢臣列傳

王漢臣隰州人也。是時歲大祲。年穀不登。城中斗米金錢以上。百姓至賣子鬻產以接衣食。猶不足。而石樓人劉廷輔。隰州人姚金湯。皆以貲雄里中。漢臣乃與王應之。王廷愛等。稱貸於廷輔。廷輔弗與。漢臣出罵詈語去。頃謂應之曰。吾等豈饑餓死乎。於是聚黨三百人。直走石樓縣水頭山。黃鶯等旦日。遂至曹村。執廷輔。輔請免。不可。廼擊牛酒。已。輔出橐中裝。得遂逃。臣等竟略糗糧九十餘石而去。先是臺御史辛應

乾請輸民糧二千五百兩以佐隰州之急。會平陽太守缺而以司理王之猷視府事。廼使同知王思睿行州撫饑民。簿責邏司急。邏司常從走卒巡徼道上。逮捕王廷會而曹堯等皆奔走。走隰州陶花里。略姚金湯橐中裝。桴鼓晝鳴。於是河東兵巡使栗在庭。自蒲州一日夜行三百里。馳平陽。奉臺御史檄曉譬諸偷。諸偷由此解散。事聞。下戎部問狀。當是時。臺御史侯于趙。新到官。管事。大司馬馬請付臺御史案驗。詔可之。始解州判葛輅行隰州事。而平陸簿吳世濟行石樓事。部索諸郡。生得王漢臣。王汝愛。王應之。王

賈。王邦彥五人。檻車傳臺御史。臺御史猶欲捕曹堯
急也。前是解州守宋偉未到官。臺御史不論論葛榘
等罪以請。上幸恩貸榘等。詔所司加意撫恤毋致
流離失所以啓釁端。是時癸未夏五月也。

讚曰

傳曰。一旦有急叩門。不以有無爲解者。惟朱家劉孟
耳。王漢臣稱貸於廷輔不可得。遂亂乎。余常過三晉
其下山廣川狹。民貧土瘠。賦役頗繁。假令歲比豐稔
民猶難之。而况有如水旱。國胡以相恤也。當是時三
晉尤苦虜騎哉。

礦盜王張住列傳

桃花溝及溫峪山五虎關皆芮城垣曲夏縣諸礦洞也。先是戊寅平陸礦徒導河南諸偷既渡河阻山公行。上有詔詔比江西湖廣例。彼此約會協捕務期盡絕事寧一體叙功論罪。居乚何河南沔池人王張住小倉觀朱世安趙仲保等常與芮城垣曲夏縣人相得甚驩。當是時夏縣有溫峪之礦芮城有桃花溝之礦垣曲有五虎關之礦於是溫峪山二岔溝諸姦民謀曰道河南人至吾等因以爲利不亦可乎。頃之王張住小倉觀聚黨二千人乘十二月盡冰堅可度。

遂從川里等。廼以羊一豕一。鳴金鼓。祭河度。直走溫
峪山。取沙。漸增至六千人。會刁家溝山。忽摧裂。有沙
可化爲銀。而王張住等。盜心益熾。盡溫峪二岔之間。
皆爲保姦矣。於是縣備礦簿。王寵請於河東守巡使。
卽引兵馳蝦蟆口。逐捕諸偷。諸偷奔散。頃之。諸偷大
入。城桃花溝。簿何志儒追逐。生得礦酋蘭一枝等
八人。而垣曲令王文煒。亦從邏卒。備五虎關。時礦酋
已從上下柳窩。至甕兒口。度河矣。守備李材。提邏卒。
轉關中流矢。幾死。於是給諫顧九思上書。請御史臺。
諭以禍福。令其解散。大略欲重臣爲救荒。彌盜策。是

後御史臺許守謙大會御史原登雲。卽後河南都御史衷貞吉。廼從黃河以南。宿營解諸賊。上復有詔。詔兩省巡撫各嚴督司道協力驅捕。禁戢毋得疎玩。是歲萬曆丙戌也。於是千戶顧託提兵三十人爲一軍。軍於石縫峪。戴家庄。劉思忠提兵三十人爲一軍。軍於李家庄。底塢庄。胡懷遠提兵三十人爲一軍。軍於盤頭鎮。張上提兵三十爲一軍。軍於好羊度。指揮張冠提兵三十人爲一軍。軍於陝州東庄。陳一清提兵三十人爲一軍。軍於三門村。王度提兵二十人爲一軍。軍於茅津。百戶李貴提兵三十人爲一軍。軍於

太陽渡。趙貴提兵三十人爲一軍。軍於西故村。皆禁
它使過。賓母往來孟津之間。時有操艇而問度者。罕
而希矣。後裴貞吉上書以爲所司飾詞推諉。先是榜
人李公化告芮城礦賊趙利。擁衆奪舟而渡。事下靈
寶縣。具知趙利非礦賊也。是時利有麥地濱河。公化
廼與南思誠等渡河而盜。毆傷守者陳龍。張朴。賴趙
加益扶救得解。而邏使焦旋左驗。於是利與公化對
簿芮城。會掾史李子春與化有親識。乃給言利故礦
盜實。擁衆而度也。乃以利繫獄。後靈寶得其奸。以爲
曩所請擁衆而來者非實。頃下平陽。同知史自上浴

縣令廖道充。後先雜問。具如靈寶所按驗。於是當公化徒罪。而貞吉亦非以李公化誣趙利。而遂槩謂河南無礦盜。大意欲分界嚴防。效同舟共濟之誼也。

讚曰

語曰。天下熙熙。皆爲利來。天下攘攘。皆爲利往。礦徒豈以爲利而來耶。疆吏第堅閉其礦。土人尚不敢爲利。而況于流寇乎。臺御史令黃河以南。爲營而守。良有以也。嗚呼。捕盜有如暴勝之張敞。其人則礦亦天地自然之利也。然何必堅閉哉。

礦盜張守清列傳

張守清。五台人也。邑故有五台山。廣可七百里。其間
林木茂盛。叢襍土石。甚崎嶇。守清與其黨郭西山。張
盡忠等。聚黨三千人。居鐵舖村。專以礦盜爲務。頃之
藩王與清通婚媾。好行私惠。以招亡命。黨類漸增。廼
以郭西山爲大頭目。何矮子爲小頭目。守清爲人機
械變詐。不可測。諸偷從令。則分財利。有如一。日不奉
約束。清必筆死杖下。納之溝瀆中。以示威重。有司莫
能禽。庚寅秋。上有詔。詔臺御史按驗。於是制置使
蕭大亨。及御史賈希夷。爲檄曉譬。令歸降。不則天討。

必加若等。於是張守清踵軍門上狀。具言盜礦則有之。實無它腸。願假清死罪。頃鐵舖村人袁秉臣言狀亦如之。願立爲保長。使開礦納稅。事下鴈平兵備使張惟誠。屬代州守黃思道。五台令常自新問狀。請以鐵舖村土著及晉府佃民流寓。大率四百九十二戶。編爲一甲。卽立張守清爲保長。郭貴爲保正。許廷珍爲保副。丁厥爲老人。開礦取砂。歲賦一千五百兩。封輸縣官以佐邊。先是。上詔督撫詳議具奏。不許虛文塞責。是時臺御史李采非議。官使使者監臨。而以所覈砂官七民三便。頃代州守及五台令請以十分

爲率官取其五。而以半予民。於是守清卽以所置屋三十五所。改爲鄉約所。而置制使及臺御史。皆以爲可。乃上書請立循環文簿。每二季一筭。而以縣使封輸布政使。歲杪轉運民部。於是事下該部問狀。其後御史任應征。劾奏臺御史及總戎李如松。連標亦奏清結婚宗室事。有狀居頃之。給諫王遵訓亦上書言撫處失宜。而張貞觀以閱視行宣大。深言開礦有五不可。語在奏疏。大都欲給守清等批執。令歸耕。敢議令及不如令者斬。礦洞請以石填閉。建墩臺於上。弗得通。卽置防守使一人。而以營兵三百人戍守之。沒

守清宅給軍。而令平刑守備。使月一巡視。每季抄北樓叅將。察其殿最。而賞罰之。著爲令。書奏。下該部。於是大司農及大司馬石星。當案礦事。皆與給諫議同。上從之。令各產礦處。有司不許私收商稅。復有詔。赦守清罪。得歸故籍。是歲辛卯夏也。前是御史蔣春芳。奏五臺及蔚州靈丘。廣靈廣昌諸鑛。皆無絲毫左驗。惟強括富民。培植傾家。不至斬搨不已。自守清辟後。而民始得有今日。豈非大疑係哉。

宣大鎮

史二官車達鷄列傳

史二官車達鷄。皆三衛部夷也。阻山後以爲險。二官常與黃台吉相仇殺。亡厭。嘉靖中。幸悔過。廼衿甲面縛。詣臺御史劉璽曰。纍酋願旁近塞上。逐水草。唯將軍所左右。於是臺御史請於肅皇帝。幸報可。由此史夷得牧龍門所。隆慶初。車夷達鷄亦自虜中亡抵於邊。吏請牧滴水崖靖胡堡。自是之後。二酋常往來虜中。爲間牒以自效。久之。老把都黃台吉聲欲犯漁陽。而制置使王崇古卽使史二官深入朵顏部黑臭

營。訶之其狀。閒告漢。亡何。黃台吉東徙。推擇胡中。美
女子爲婦人。是時車夷大恰。奇老撒。人物故。而恰有
子曰敵壘。撒有子曰八不刺。皆年少不視事。而以所
部哈不當。在密雲邊。幸有女。哈不當親阿卜者漢兄
也。已。又得車夷克臭女。及朵顏阿太女。史二女。黃台
吉并皆室之。曰。吾長王胡中。若等豈憂貧乏哉。居亡
何。黃台吉比妓。益思其父哈不當。廼單騎至密雲邊。
迎謁父。父與阿卜者漢偕往也。而車夷革固燒花柰
等。亦惑比妓言。遂引衆去。動以百數。頃比妓復使酋
長肯吉布。恰啞石害。首領哥。躬帥所部刺八他不囊。

等二百餘騎。馳瓦房溝。西至水克。鹵獲車夷哈計。哈班賸。擦哈。賴卜肯。及禿廝箇兔事。胡累去矣。於是御史孫琮。劉良弼。劉堯卿。給諫張書。皆後先上書。陳大計。語在。奏疏。而臺御史吳允業。已與制置使王崇古有成畫矣。是日卽召大酋達鷄。敵壘八。不刺三人。小酋伍藥禿廝額等一十九人。庭中問狀。大率未去者。凡一千八百八十二人。皆一切罷撫賞。因以檄譙讓順義王曰。柰何教兒子不謹。而廼誘惑我屬夷去乎。趣歸我。不然者。我敗乃市賞也。黃台吉果惶懼。問諸比奴。乃送奉阿卜者。漢到邊。已復爲酋婦所誘。

窮夷五百人竊比史車事。請撫賞。當是時。史夷服屬
已久。畜產頗多。而獨車夷此。竄無積聚。常盜竊馬牛
羊。已廼計畫無所之。輒欲僭緣邊。卒從征。微徻於搗
巢。赴馬。而遂因以爲利。及後。貢市成。毋用武。惟仰
食縣官。而老把都又從旁行搶略。帳中澹如也。臺御
史於是嘆曰。車夷以窮困故。來歸我。我不蚤自爲若
地。若寧不掉臂去耶。於是請築堡三座。以安之事。下
大司馬譚綸議。竟寢。廼於寧遠堡。及四海冶。並修起
牆垣。令二夷歲時逐滴水崖水草。有如一。日不可知。
虜來。并皆匿前垣。老把都烏柰彼何也。是歲萬曆癸

酉也。後五六年戊寅。御史黃應坤。請簡二夷中。梟騎
四百。備營兵。得粟食縣官。人月三斗。而大司馬方逢
時。以爲不可。久之。給諫田大年巡邊。以爲二夷最爲
心腹患。莫若曲爲隄防。明年。御史徐鳴鶴。上書。意
與應坤同。是時梁夢龍本兵柄矣。而亦以爲宜厚其
撫賞。於筴便。皆以夷性毋厭故也。先是裨將麻貴。約
束車夷。車夷迺不就。日夜惟決筴於北虜。而史二恐
事覺。辭且染已。迺踵軍門。請曰。車夷遠邊。交連北虜。
意欲何爲。將軍蚤爲地。由此邊吏殊不虞。史二有它
腸也。久之。俺答幸款塞。結離而稱臣妾。緣邊卒皆虎

睡倒載干戈無所用。相率去墾田。而史二以爲我今
復欲牧馬長安。鵬鶚滴水赤城之間。毋迺蹂踐禾稼
而幾犯漢法乎。於是帥胡龍那木神堂等穹廬二百
亡虜人二千五百八十三口。索駝馬牛羊六千餘頭。
竝馳樣田堡。因至馬鞍山。初史大侵盜老把都馬牛
羊。老把都常稱兵欲報之。於是盡以橐中裝藏龍門
滴水寨。而老把都僅執其犬子擺三兒。後邊吏讓俺
答急得解免。至是盡携橐中裝以往。往依安兔也。而
備龍門者將馬一龍。從正峪嗟瞭之。安兔乃帥千餘
騎。亦皆達史夷於塞外。於是自黑峪口。至紅沙嘴出。

邊揚揚騎馬夾道而馳乎。即使使者追之。問曰。若亡何也。曰。我亡以內地多耕種。吾無牧所也。且麻將軍不食我月米已兩月矣。不去將安待乎。旦日叅將麻承詔告於總戎李迎恩。副總戎張元。於是偕守巡使。穽化龍陳于階。以請也。而御史連標廼以其事屬同知毛似荀。通判任國相縣令趙爾守。具得其狀。因

上書劾裨將馬一龍。楊諭。李天爵。李寬。李迎恩。黃明臣。已劾大司馬王一鶚。上有詔言將才難知。大意不欲盡歸本兵故事。二夷月有米。歲大賞凡一。小撫凡三。至日。北路則靖胡保。東路則龍門所。以爲期會。

先是備守靖胡者將董用威。父負大酋那出賴。黑石等。月米至一百六十有奇。羊酒麴糶銀至三十八兩有奇。而是時胡中或言譟者梁天祿。何故鎖我史二子紅亥。或言麻叅將蒼頭軍。何故疆奪我騎馬。口語甚藉藉。而又會庚寅春。自正月至四月。法當行小賞。後以米蘖不具。改六月。而史二遂怪麻將軍不我給也。於是大司馬王一鶚。廼復奏。上有詔。貶麻承詔俸一級。逮問馬一龍。李寬。罰楊論俸凡半年。黃明臣凡三月。李迎恩凡二月。已謂邊方事務統率制馭全住督撫。豈得無罰。於是罰蕭大亨。郭四維。俸凡四月。

也。自是之後，塞上益執其史夷子阿哈大車夷子他喇言及所部已奇。力箇置之園土以爲質，趨歸故巢而給諫王遵訓以爲不必招來。張應登以爲罰服不必問再來，不必留說誓不必聽。葉初春以爲安危利害之大機，毋謂去留不足爲輕重而斷事。張壽朋亦以爲宜乘其自去而姑置之。當是時，上幸遣給諫鍾羽正行檄至龍門三岔，迺召降人瓦四阿猶器問狀而史二明從瓦房溝遷徙黑阿矣。黑阿去靖胡龍門不百里而近，志未嘗不須臾忘取阿哈大也。始車夷治裝急，遺橐駝馬牛，牛一千有奇，在滴水崖靖。

胡堡。其後遣胡罷帥九十餘騎直走滴水崖。賴楊諭追逐罷空返。久之。史二亦使虜騎入永寧。至周四溝。搜牛羊遊擊。杭大才鏖戰。斬首捕虜二十餘級。虜亦傷我軍五人。然大才中流矢。幾死者數矣。明年辛卯夏六月。星隕從東北走。天鼓鳴如雷。其秋。史車竝詣塞上。請撫賞以示款。大才廼奮髯抵几曰。是屬尚有可信者乎。卽與守備彭繼祖等提兵擊破之。生得酋子紅亥等五人。把都兒等三人。降哥落箇一人。總戎李東陽廼告於制置使蕭大亨。臺御史郭四維。於是御史吳禮嘉訪誅納以聞。詔賜蕭大亨金二十兩。

表裏二之郭四維李東陽金十五兩表裏一之孫化龍與杭大才等金十兩韓子宣金五兩彭繼祖等金八兩張雲鷺等金五兩是時順義王捨力克以西行迎佛因助火落赤故罷市賞庚寅辛卯皆未與度非有大功勞不敢以請迺與忠順夫人三娘子議乘東歸遂逮捕史二及大酋我列復與膠致塞上曰願復我市賞於是制置使請於上詔復二年市賞轉遷不他失禮爲都督僉事邢木兒台吉爲龍虎將軍及滿官正比妓金皆二十兩紅段二純大成比妓金十兩紅段一純賜活佛曰朵兒只唱是歲萬曆壬辰

也復 賜蕭大亨太子少保秩金四十兩飛魚衣一襲。父任邢玠爲都御史與王世揚金皆三十兩表裏二之韓取善金二十兩表裏一之。父任馬林爲副總戎加王世寶爲叅將師國勲爲都護安天爵爲守備金皆十兩已。 賜鄭洛石星金四十兩飛魚衣一襲王基陳有年金二十兩表裏一之楊于庭金十五兩。父之給諫吳之望 上書大略以史二故安兔壻而安兔則捨力克兄也宜在賞之以酬功必令執吉妹而竢松虜過賀蘭山套虜釋夙怨而後開市便先是上有詔史首原係降夷來歸不宜深拒但當安插得

所。永杜后患。明年春。大司馬石星。竟以制置使議請寬假史二。我列阿哈。大紅亥等十八人死。罪而復以吉妹子胡獨兔。我列子。單獨害爲質。廼令吉妹。唃羅海塔利等。分列於長安嶺。龍門所。滴水崖。如故也。

詔從之。自是之後。安兔復帥大酋打兒漢等。犯我擦石口。制置使廼縱塞上精兵。提阿哈大。及唃羅海塔利百餘騎。逐擊。以微察哈大意。誠否。哈大殊疾力。破之。斬打兒漢。公用汗等首一十級。得生口二人。奪獲馬三匹。哈大於是乎。誠服屬矣。吾始以爲安兔明而習於計。而後廼今而知安兔寡謀。幾敗廼壻事也。

讚曰

以余而觀龍門四海治城堡皆屹然若泰山而四維之也。嘉隆以來益務爲武備壯哉。今史車二夷得保塞。倘亦有受降城之意乎。傳曰。夫人深信我。我背之不祥。塞上於二夷可謂信我。今藉其力以免是害。豈直一方利哉。四夷觀望亦當有聞風至者。

河南

礦盜王西庵鹽盜塗四列傳

王西庵。礦盜。塗四。鹽盜也。先是汝鄧邾嵩食河東池鹽已。池鹽不產。食官鹽。官鹽味苦。食河北海鹽。賈始騰湧矣。是時邾人塗四。原武人胡順。專以私販爲務。群數十百輩。執鬪器。白晝走河北。河北人樂爲保姦。於是河北之塗。車擊轂人。肩摩。盡皆鹽徒。殷殷不絕矣。而王西庵。迺與蔣四。嘆曰。子試度礦孰與鹽。四曰。礦利。鹽亦利。利等耳。顧礦利大。鹽利微。然此時則無踰於鹽者矣。盍去鈞鄭密陽之間。略鹽賈以爲利。可

乎。西菴對曰。吾意政欲如是。旦日卽聚黨百餘人。走鄭州。鄭店驛。張家庄。詞道上。諸鹽徒。每一鹽徒至。西菴等劫人而奪之。鹽鹽徒見爲西菴等亂。桴鼓晝鳴。廼往往從它間道走。西菴於鄭州不得去。密縣。密縣不得去。鈞州。鈞州不得去。滎陽。所過諸村落。西菴必索米麵及牛羊。盡饜飽而後去。行間有如鹽徒。不可得。得行人。廼略其橐中裝。不則執而僇之。示威已出。所略橐中裝。走河北。販鹽。旣還。行至磁固堤。會塗四。與胡順。胡六。合凡三百餘人。饜西菴等。笑曰。始吾爲通衆所略。今廼衆。吾豈顧念哉。亦執而奪之已解縛。

鹽盜走河北。礦盜走密石。婆山縣尉崔進忠提鄉兵追逐至汜水。我兵張坤羅訓等數人中流矢死。而是時鄭州守吳敬夫密縣令蕭文元尙未及請於備兵使田汝穎以故御史褚鈇臺御史吳道直皆亾從得聞也。亾何鈇竟從往來者得其狀。微使開封同知張榮謙司理侯世卿以覈保甲行縣。果與往來者所言無異。於是御史案田汝穎以下罪以請。時甲戌九月也。而王西菴猶在石婆山。時時欲報塗四胡六。顧未有路耳。

讚曰

鈞鄭以河東池鹽未產。食海鹽。遂買禍至此。然則海鹽於鈞鄭之間。豈非宜罷乎。余過大梁之墟。求問歲歲爲郡邑所患苦者。皆曰礦盜。且鹽與礦。皆天地自然之利。語曰。天下攘攘。皆爲利往。假令疆吏終禁而勿開。柰國計何哉。

白蓮教喬濟時曹崙列傳

喬濟時，楚隨州人也。聞桐栢有銀冶，當買田宅於其間，已爲巡徼老人給事縣庭中。因盜竊礦沙以爲務。亾何里中子周一和，導濟時習符術，符術成，常以符張四壁，自言能禍福人。居頃之，北直人龔志向巴蜀人羅仲川至，往謁濟時，謂濟時狀貌魁偉，類太上真君。於是約立白蓮社，而張林遂好，謂志向曰：「幸有黃石遺書，中言趙王后代當出世，有劉元豐、金盆李姓爲輔，志向益鄉往之。廼旦莫過從，濟時遊而里中惡少年亦由此歸濟時，殺牲鼓舞，尊之如神云。」頃張麟

造符命稱奉天承命封號語妄誕不載各以一紙給盧貢元等期上元一軍起鎮平一軍起唐縣一軍起隱山一軍起平市店一軍起舞陽並馳潼關迎趙王志向等唯唯由此治甲兵飾闔器日夜誦孫武子兵書不置也久之鎮平鳳陽店伍長康儒覺告於巡徼吏何大使廼與通判周厚提兵執張麟及濟時繫獄餘黨皆遂逃是歲萬曆戊寅也而勛陽臺御史徐學謨以其狀聞請以檄二道以一道移保定大索龔志向張林以一道移巴蜀大索羅仲川而盧貢元等六十四人皆妄愚無知徒爲時濟邪說所波蕩甚不

足以汚刀鋸也。願哀憐寬假其死罪。臣等敢宣上德意令解散。而大司馬方逢時覆奏之。上謂邇來捕獲劇寇多係妖言鼓煽亂端。下所在嚴緝曉諭。於是梟斬喬濟時。使爲比丘者知假於鬼神以疑衆者殺。明年春御史張簡請加守備一人居唐縣巡徼南陽。詔從之。

曹嵩儀封白蓮教也。常從道士朱質所習左道。頂得其道。自度吾能號召豪傑矣。廼集數郡人結社。旦莫焚香誦經。膜拜而師事之。久之。勃勃然欲反。卽與衆馳北小寨。趙應時遂九合李枝楊進朝張景陽等百餘人。期旦日日莫走蚕岡。夜半焚計廷友室。會鄰人扈寵覺鼓噪而趙敬泉徐大才卽縛寵劒斬之以繫旗鼓。已走董家寨。焚董邦先。已復走麻如寨。奪守玉索中裝。時天已大明矣。大張旂志。旂志大書巖伏三乘教主。收長九九圓明轉化南無了道。於是侯守良等束白帶騎馬直走縣西南關。殺鄉兵陳志友二人。

傷孫廷現六人。會城下一人汲水而來。望見守良驚。大聲呼城頭人。城頭監門賈大用猶未啓魚鑰也。卽擊鼓告縣。會縣令缺。都事王延行縣事。急使尉門子先提邏卒到城而守。良先已斬汲水者頭。縣城頭而去。我兵追亡逐北。至馬家庄鏖戰。生得張景陽侯守良等三十餘人。奪獲旗志妖符諸什物。亡筭卽梟斬景陽軍中。廼復與膠致守良繫獄。殺賊皆犇散。於是開封府巡徼同知薛選請於守。巡使丘岳王淑陵皆行縣。得其狀。而臺御史周鑑。御史蘇民望奏。上事下大司馬。方逢時移咨諸省。大索曹崙王後溪及吳

大剛鍾相十六人復刻畫崙面貌因下令曰有能生
得崙者予百金頃保定臺御史張鹵以東明縣逮捕
王後溪來聞後溪別名王廷善與崙相得甚驩居
亡何歸德守鄒學柱鹿邑令張瑞使使者跡至安平
生得曹崙及其母胡氏妻焦氏兄曹崑姪男三人女
一人是歲萬曆庚辰也而御史大夫陳炯輕重當崙
等罪崙至死其姪男年皆十五以下得減死與妻母
給功臣爲官奴婢當是時馬樹林子數百人亦携妻
兒子走宣府以醫卜走馬賣械爲務而守備邢官以
爲賊至帥兵逐捕之馬樹林子善飛石傷官有狀於

是給諫王汝謙案制置使鄭洛書並劾奏其事。先是給諫梁式湯聘尹後先上書杜左道防微慝。上有詔詔所在左道惑聽之徒嚴行禁革大都諸給諫之意恐有如一。日如呂愷高本王志學輩相因而起也。

讚曰

佛法及吞刀吐火飛沙走石諸術其名爲幻。此皆來自西域而乃以愚我中國民。中國民往往受其愚自愚也。異哉幻術此猶兒戲不足深惜。余獨怪白蓮羅教能帥數十百人皆奉若神明。蠱人不當如是耶。賈誼曰風俗之變皆以爲適然恬不知怪。悲夫假令喬

濟時曹崙如不自禍。則其禍人。曷可勝道哉。

張小村列傳

張小村。別名加忠。河南人也。初。酋長楊儒。與小村以販鹽爲業。已聚黨一百四十七人。阻宿州界上。界上亭長。帥邏卒逮捕張廷恩等。凡一十四人。小村等皆遂逃。而是時。宿州人劉才。居渠溝山。專爲諸偷保姦。於是小村與其父大才。及栢世龍。楊儒。王滾。王繼等。並亾抵於才。遂與王登。楊貴。王繼。擊牛酒爲盟。盟爲昆弟矣。先是。廷恩對簿縣庭。具言其狀。而永城令屈策。微使使者杜孟儒。至渠溝。謁小村。小村果在才所。適出。使者逮之。欲走。才廼擁衆執使者。縛之。奪小村。

會縣尉彭文采至。才卽鳴金鼓。鉦砲如雷。欲殺尉。尉
急使使者告策。策卽躬提兵至山。才鳴金鼓如初。而
令男劉應龍宗人劉淵上屋飛亂石。石下如雨。擊策。
策蒙石矢。并及蒼頭軍張崇貴等七人。策頭顱流血。
血至染衣。幾死。奪驛騎馬二頭。而百戶李珩兵亦至。
才復走山頂。持弓矢鄉珩。珩無可柰何。僅生得武功。
武安民孫時化三人繫獄。策卽移大梁兵巡使謝師
啓。於是臺御史褚鈇偕御史許子良。廼因郵置以聞。
請咨鳳陽臺御史捕才。必欲得小村。頃之。漕使者凌
雲翼檄鳳陽。規浦朝柱。歸德判周邦爵。問狀。始響馬。

盜岳其及申長子之役。皆劉才爲保姦。由此觀之。非獨小村罪。蓋亦保姦使然也。

讚曰

余觀宿州與永城中間不至十餘里。然一屬秣陵。一屬大梁。有如一曰盜賊公負。豈不互相推諉乎。頃大梁及睢陳備兵使。皆統于漕使者。率有味哉。余又聞河南南陽民多驍勇。出入陳弓矢。矢袋俱用毛皮。俗號爲毛兵。往往誘礦盜爲姦。善乎臺御史衷公欲招致爲兵也。

饑民車宗孔列傳

車宗孔號小岡。滑人也。丙戌歲大旱。而滎陽人趙國英。張學書。廼易變數萬斛。漕下臨清。欲因以射利。行至清巖河。會水涸。低徊者三月。國英度舟不可行。乃索僧人欲轉變於其所。是時車宗孔與王安張喬等相與嘆曰。小岡猶人哉。柰何困鹿有腐粟。而吾等糲糠不厭乎。卽聚黨六十餘人。稱貸於英。英不從。於是宗孔之衆皆欲畧英變。固已口語藉藉矣。而學書聞廼貫弓執矢。欲射宗孔。宗孔與其姪應科走淇鳳凰臺。取秦現藍。廁牕爲旗。招致饑民。復馳河上。竟欲奪

國英等變丹。國英急走汲公庭中。汲使其丞湯克寬而淇亦使其尉陳子懋提邏卒往。宗孔殊死戰。傷我兵盧思考右肱。而我兵亦生獲王安張喬等九人。宗孔等皆遂逃。於是滑縣請於守巡使李一中。因聞臺御史衷貞吉。御史徐申。廼檄淇汲部索宗孔。是時宗孔居神丘集。去縣可七十里。而應科及所善韓鳳儀居城中。並逮捕繫宗孔等家室。屬淇與汲令問狀。請論宗孔如法。王安等實非首盜。得減死。時丙戌八月也。臺御史因郵置以聞。事下大司馬張佳胤。案論之。於是上有詔。詔臺御史防範勦捕。大都謂流賊

糾衆流劫。漸不可長也。

讚曰

是歲也。天子幸哀憐諸災民。特下詔曰。今有司撫字無方。賑濟無術。流亡載道。而不之恤。盜賊竊發。而不以聞。復申之以嚴保甲。緝捕盜賊。無敢滋蔓。賤臣每讀是詔也。則未嘗不再拜稽首曰。欽哉王言。此與文王視民如傷。何異乎。傳亦有之。一夫得情。千室鳴弦。以賤臣所聞。直指使。每上災傷盜賊事。陛下獨薄責守令急。有以也夫。漢文帝曰。與百姓安其田里。而亡嘆息愁恨之聲者。其惟良二千石乎。凡守臣當

如此。

王自簡列傳

王自簡小名趨兒。家世新蔡人也。爲兒時常以拳搏擊人。膂力絕倫。長學擊劍。劍成。會男小薛兒壯。尤善援牆壁。每有窘急。輒上牆走。走如蜚。諸有力者皆自以爲能不及也。而四方異能之士多有欲招致薛兒及其父與俱爲亂者矣。而趨兒所居在瓦店。瓦店故潁州所屬也。去州可一百八十里。去新蔡猶遠乎。居常常有不軌之志。而甲午歲大饑。廼召薛兒謀曰。光固息蔡之間。往往欲從吾等起者。然時不可失矣。而是時息縣及歸德牛頭灣饑民聚衆至數百人。阻山

公行。趙兒廼合黨以千百數。是日卽拜趙兒爲大王。出入乘使者車。晏如也。於是直擣陳家橋。迎仙橋。略孀婦陳及段鳴遠橐中裝而去。我穎上兵使者常逐捕趙兒。不走。新蔡沈丘。則走項城息縣。急則乘山舉火。焚人屋居。以拒兵。縣道唯趙兒所出入。趙兒幸亡恙。先是通判趙宗禹欲請兵勦捕。而州守李元齡欲以計禽縛之。而兵備使李驥千亦以漕使者李戴臺使者張一元直指使者牛應元檄許歸降。得除罪。它一切諸饑民悉給票爲照。資道路費。今生還梓里。賊黨由此解散。而指揮使姜濟美劉京僅後先得河清。

武勲傳好禮。韓萬良等數十人。以何趨兒携其妻蔣氏。及薛兒微行至州城西。謁事。事覺。爲指揮使武烈。王孟時。蘇繩武所逮繫州獄。漕使者廼以其事奏。於是以李驥千下銓部紀錄。優叙李元齡等。而賜武烈等金五兩。姜濟美等金三兩。王自簡梟斬潁州市。時四月也。始兵備使居壽州。已移潁州。從上命也。

讚曰

上意在撫災民。災民有如動搖而起。輒悔禍。輒止。縣道勿深治。夫王自簡之屬。當至死。以血纍旗鼓。卒僂一渠率。且法如是足矣。傳曰。父母能生臣。不能使臣

死而復生。今災民蒙天子更生哉。孔子曰。蕩蕩乎。
民無能名焉。殆非虛語也。

萬曆武功錄

翰林院添註待詔瞿九思著

陝西附

寧夏

礦盜楊戩列傳

楊戩成縣人也。徽成寧禮間有金銀冶。山林茂密。戩常與寧羗人楊二熊五文縣人。孫長漢階州人。劉東泉曾緒。吳九堂。龐友科。伏羗人孟林喜。岐山人劉西泉。專以盜冶爲務。會縣令馮以閑。堅閉弗得通。戩等相與謀曰。冶閉。吾無錢用。盍去略可乎。迺造旗幟。去

兩當略晁水已。去徽州略袁進已。去文縣行至新店。略趙孟支橐中裝殺其男邦時而去。旦日直走大小山麻鞍子麻園河。略我兵陳興祖等三人。是時楊戩之衆已一百八十餘矣。出入張旗幟負牌。往往淫汚人婦女。母厭會指揮孟孝臣爲守備使。提邏卒王狗兒等巡徼道上。不可得。廼請于分巡使咸懷良。而徽州銀兵已雙獲旗鼓。得從賊七人。於是懷良簿責階文偏將軍郭邦急。頃徽州人廖世銳復執酋長楊戩等十餘人。獲輿膠致守。巡使徐學詩及懷良所治請讞戩等叩頭服實有之。具言孫長漢等六十三人已。

遂逃走禮野猪山矣。亡何馬力坡千戶王佐才言賊自峨州走寧遠。擲撒鍾奪道上諸行人楊萬世劉世南楊思明王世興等諸什物及僂與妻張一人。是時洮岷備兵使李自強與學詩懷良議卽請于臺御史傅希輦御史趙楫因徵銀兵往正其罪。銀兵生長山壑中。最善登高臨危尤習地形。於是推擇老戶爲鄉導。急使佐才統之。追亡逐北。至胭脂溝。生得張仲勤劉榮王世江張寅四人。斬首一級。而賊亦殺我兵輦良真三人。佐才訊仲勤。仲勤言實遺九十三人。今走岷州。頃縣道皆游徼。於是禮令郝燦生得柳進喜黃

寬成令馮以閑生得陳邦化及宋邦道妻劉氏餘黨
奔散先是隆慶末頒捕盜條格甚備會希摯奏楊
戩事上問輔臣責司道兵備使至嚴乃詔都御
史侯○事寧之日從實查叅於是給諫光懋案咸
懷良等罪故事郡縣巡徼吏盜至十人貶一級二十
人貶二級三十人坐法免兵備使所部有盜合至五
十人者貶一級七十人貶二級百人以上免官亦如
之有能捕斬得除罪請論如功懷良等於是平有罪
矣是時已卯三月也其後七月希摯以轉遷小司農
上舉劾疏上念礦賊事希摯竟未復奏大怒下兵

科問狀而給諫李選上書大略謂希摯自三月以至
于今時已半載矣。設無一言及礦賊。乃獨具舉劾爲
市恩循例之舉。請坐摯法以爲玩。旨曠職者之戒。
上竟免摯官。下御史問狀。明年春都御史李堯德
輕重當日強等罪以請。上有詔罰李自強。徐學詩
俸三月。貶郝傑閩輔臣秩一等。鄭國仕秩一等。楊思
學。金斗秩一等。於是梟斬孟登等。以徇諸礦。

贊曰

上方信詔令。罷一都御史。而百執事豈不凜凜乎。然
於舉劾疏猶記憶礦賊事。可謂至明察而摯乃久不

報何也。語曰。法之不行。自上始。上今法必信矣。人臣奉法循理。亦足爲治。何必不信哉。

回夷列傳

回夷西延慶平鳳漢間夷也。郡縣編入版籍。名曰回夷。歲時視麥熟。皆携妻小賣藥課命。仰食它旁郡。歲凶亦如之。是時里中暴子弟。多有附回夷而起者矣。丙戌歲大荒。回夷五百人。姓名莫考。皆騎馬羸持弓矢鎗刀諸鬪器。由涇州直走靈臺縣。縣尉尹三聘躬帥邏卒逐回夷。回夷於是止高山爲壘。居一二日。復犇麟遊縣。略王尚仁等畜產諸什物。而平涼分巡使李自強及關西分巡使苗淳然告于都御史李汶。因請兵急使千戶徐金。日莫泊甲兵。巡徼甚備。回夷度

漢兵徵發如雨。弗敵。廼走永壽縣。過分水嶺。我兵追亡逐北。至王梅灣。殺回夷六人。奪牛驢五十頭。而回夷亦殺我兵槐守剛等七人。殺傷大當。於是走三水縣土橋鎮。已走淳化鄭家山。略鄭尚彥等橐中裝。廼復走耀州。與荒民合黨。賊勢益熾矣。遂阻文王園。以爲險。文王圍去州可四十里。去同官可三十里。會關內分巡使田大年。及叅將高節。提兵五百人。追逐賊。賊殊死戰。傷我兵張腰子。及同官尉賈寧左臂。略順義丞鄭邦畿馬而去。我兵生獲回賊張自來兒。及賊從權東采。東采。蒲城人也。具言始故從邑中子權東。

堯權北勲。歸淳化夷白長漢馬長兒馬文昇。而會漢人屈應時。三水人田和尚等亦至。遂聚男婦千人馬羸千騎。計欲走澄城。郃陽。韓城。因合蒲城栗園里白水。苜蓿溝。諸回夷。廼使米訶事。事覺弗可走。而通判杜存兵至矣。乃鏖回夷戰。大破之。奪獲馬驢一百六十九匹。回夷竟走馬鞍山。於是都御史復移潼關兵。備使原一魁。及西安司理張守軋。躬詣同官。欲殲滅賊。是日同官擊牛酒犒諸軍。諸軍卽追逐賊。賊敗走。走至秦山菜道坡。則去同官已百里而遠矣。諸軍勇氣益百倍。皆持鳴鏑射回夷。回夷中流矢。死者一十

五人斬首一十六級。生得女子一十五口。奪獲馬騾
驢三十七匹。諸夷盡走白水縣。於是都御史大會三
邊制置使邵光先及御史董子行請於上而給諫
顧九思亦劾。奏關中諸臣大略謂賊起必有所由
始。不行追論。則疎縱之罪。何以懲於前。賊散。必有所
從去。不知稅駕。則蔓延之禍。何以杜於後。事皆下大
司馬張家胤問狀。是時歲饑。民流。流死。而以死者。縣
道左樹上。民多爲盜。大司馬獨憂在饑民。廼欲嚴保
甲。練兵戎。回夷第請勦渠魁。凡脅從未至殺人。有死
罪。得減死。給票釋歸。書奏。上有詔。詔督撫相機勦

處以安地方。毋得姑息養患。明年都御史王埏討平之。上罰劉廷臣俸。而以楊維善下御史逮問。為斬馬毛等狗諸夷。時四月初四日也。前是壬午歲回夷李宗鶚。趙進忠等阻山公行。上覽督撫高文薦蕭廩奏。卽下詔曰。地方官不能及時勦除。却有借名招安。苟幸無事。殊為玩寇廢法。今後再不許畏縮坐視。徒以虛文塞責。致貽民害。於是上銳意欲驅除此曹矣。其後督撫請於上。廼得以回夷編立保甲著為令。令毋聚黨。毋持兵。毋搶掠。歲時諸回夷所流行。邏司常從走卒游徼道上。以備為寇。於是縣道使

使者察其勤惰。而勸懲之。敢議令及不如令者斬。以故回夷遂得居西延慶平鳳澳間。幸受一廛而爲氓也。

讚曰

語曰。涓涓不塞。將成江河。綿綿不絕。將尋斧柯。豈回夷謂乎。始回夷至關時。彼衆不過四五百人。有如疆吏驅逐之則已。何如有今日哉。迺一旦得居內郡。而權東采輦多歸之。豈不虎而翼乎。悲夫。非我族類。其心必異。余獨慮礦盜與饑民常藉此輦而起。則余未嘗不倦倦終欲驅除之也。

茶盜楊四列傳

楊四。西鳳間茶賈也。常與楊邦榜。徐大甫等。往來巴蜀間。專販私茶。以爲利。後稍稍起。趨于盜。乙酉冬。四等。日夜裝往通江諸縣。明年春正月。自巴蜀還。過西鄉。會上元城中。燈火相望。道上諸行人。殷殷不絕。四等乘是時期。諸偷大會寶豐寺。是時賊衆固已四百餘矣。廼走平落河。白陽園。邏卒任禮。馮貴等。望見諸偷。持弓矢刀鎗。諸鬪器。揚揚而來。皆惶懼匍匐走。走入洞中。避諸偷。諸偷惡禮等。避已。廼束草入洞中。焚燒禮等。禮等熏灼。不可敵。廼走出洞。邦榜執而僇之。

旦日卽與其衆大入漢陰。并子壩漢陽坪。已入石泉。石峪鋪。夏家山。復入漢陰。蔡家河。鄭家庄。已入長安。馬家庄。過鎮安。瓦子溝。五郎壩。還入漢陰。石泉。華嚴池。華之間。從塾屋金鷄黑水而出。所至輒殺略人。甚至淫污人婦女。以爲媮快。諸縣道略李應時等凡九十人。殺馮貴。及鄉人劉客童。伯林等。凡二十人。鹵徐孟義。劉朝甫等。凡六十人。淫閭氏王氏等。凡數人。於是商洛撫治使李琦。帥守備使吳從周。通判毛志忠。追逐生得楊四。楊邦榜。楊伸。吳才。李朝貴。張萬山等。罪當斬。是時關南分巡使張思終。久轉遷。而僉事使

苗泮然行關南事。時已三月矣。先是志忠以茶賊事。因置郵請於思忠。適思忠未視事。郵書皆封府庫。以故不及聞。兩臺亡。何直指使祝大舟乘傳行臨鞏。招中間。而五朗壩邏司以其事請于都御史李汶。始聞四等事也。於是大舟劾奏撫治使等隱匿怠事。事下大司馬張佳胤。胤輕重當琦等罪。大意欲每遇販茶時。守備使常從司武巡徼諸山。察批引。所不以批引按驗者。請論如盜。上有詔。詔所司稽查防範。不許疎縱。於是罰李琦俸二月。貶毛志忠秩二級。罷吳從周備守事。是後御史大夫辛自修移都御史。汶御

史大舟董子行。及鄖陽都御史方弘靜。請以楊四等梟斬漢南市。必欲部索徐大申等三十人。上可之。始漢南山谷險阻。林菁深密。商販往往嘯聚于其間。廼使通判一人居西鄉漁渡壩。頃以郡屬甚廣闊難制。又令漢中守備使歲時周徼山谷中。專逐捕盜賊。抑何廩廩也。

讚曰

以余所聞關中茶盜。往往阻山公行。殺略諸村落。諸村落畏茶盜殆如虎哉。所從來久遠。殊不足爲怪異。是耶非耶。楊四以私茶觸冒。明禁罪當死。柰何復

殺僂人而徒欲因以爲利乎。宜大司馬著爲令。常以
一守備使提邏率巡徼諸山也。

曹進禮列傳

曹進禮蒲城人也。丁亥歲稜。上命縣道虛郡國倉廩以佐百姓之急。頃復蠲存留。是時金銓爲蒲令。設厰治饘粥。使者相望於道。不乏也。縣故有站銀多逋負。而禮與張汝清等常請於縣官。願移臺御史王旋。御史董子行因欲減今年站銀。銓度不可。於是寬假其期會。曰若等第安之。毋擾會歲暮。監門皆請假歸。禮等聚黨數十人。夜半走東關。皆束草爲炬。燃城門。城門火起。燒城樓。弗可撲滅。於是禮等並鼓噪。砲鳴如雷。廼以飛書置城上。復西北走。銓聞卽提邏卒馳

城上城上火光燭天。虛無人而樵樓亦鼓發。鷄將鳴矣。蒲城城以外地四平。獨惠虎山二三戶稀寡。皆不敢從門中窺視。禮等縱火燒城門。鳴砲尚不知爲禮等也。銓至。即使使者呼虎山問狀。虎山叩頭無以對。銓頃遲率李果走城上。得飛書。書大略願明府生活我。幸爲我畫便計。請免站糧。亡它腸。銓廼頓足嘆曰。若等豈要我耶。無益。徒自速滅亡。且日日出。卽告于分守使張葵訓。於是下府同知高拱宸及銓大索城中。一二月始生得禮等三十二人。輕重皆罰治。臺御史乃以請於上。曩者銓令禮曰。若等第安之。毋擾。

彼廼竟自攝死矣。誰謂而不從。乃公嚴令也。

譜曰

蒲城之邑如斗大。上幸虛倉廩。至二千三百金。爲蒲貧百姓地。豈不備耶。廼以一站賦之故。請免則免。何至是直。必焚城門。以要令長。令長豈驕貧百姓已甚乎。韓公子曰。慈母有敗子。嚴家無格虜。信哉。也。

囉賊馬有忠列傳

馬有忠。囉哩酋長也。丁亥冬。有忠常出略鳳翔諸郡。明年春。亡抵于秦州石門山。是時強賊王道純等四人。礦賊嚴世昌等十五人。皆與忠合黨。至百餘人。略隱崖。劉得時等糗糧轉入山。山高道甚險阻。不可容一騎。忠等乃得守險矣。於是鞏昌倖王堯臣及指揮使侯光啓。提兵至石門。啓中流矢幾死。廼請於洮泯分巡使郭汝隴。分守使王藻。皆乘傳馳秦州。急使僻花石山百戶趙應登。詞諸偷。諸偷中多饑民。闕匿於其中。先是關中久不雨。年穀不登。富平蒲城同官諸

饑民至取甯山石以爲食。會小司農孫不揚取石請於上。而郡國亦虛倉廩以佐百姓之急。於是秦州念饑民恐一鼓盡殲滅。廼以檄招徠諸偷。諸偷王道純自度罪至死。與其死獄吏。寧死刀鋸。弗降。亡何。銀兵百餘人以徵至。竝入山。遂阻水泉一帶。皆持弓弩射。射囉賊三人。火砲傷一人。分巡使廼召山人姚世表問狀。世表對曰。囉賊衆不至八十人。然所不就禽者。徒以得險耳。今水泉幸爲我兵所有。竊度諸酋勢不能復出略。食盡力屈。可坐而縛也。是夜夜半。諸偷僮卒出不意。下山攻營中。營中諸士兵弗敵。廼退舍。

十五里。且月請於制置使邵光先。徵固原家丁五十人往擊之。於是都御史王埏移制置使。及御史徐大化奏於上。而會給諫張希臯亦上書。大略謂屯聚既久。黨與漸多。前已亥詔曰。被災貧民。朝廷已加意軫恤。若以饑荒爲名。肆行劫奪。豈爲輕縱。以長亂萌。希臯請論如詔書弗赦。事下大司馬。於是王一鶚覆奏。請諭所司。令舉保甲之法。毋得徒事虎文。流徙之民。毋得視爲秦越。上廼詔督撫勦捕。以靖地方。明年春天鼓自東南震如雷。

讚曰

余聞之張給諫疏曰。囉哩者。回賊殘黨也。而謂未大
創艾之。良然。關中羌易以致虜。礦易以致盜。顧礦可
封而羌不可驅。羌幸亡恙乎。今歲歲爲患苦者。又礦
茶諸盜也。何廼罪羌哉。

寧夏鎮

李拜李承恩

李拜。胡人也。嘉靖中。亡抵於朔方。備蒼頭軍。久之。爲巡邊營都指揮使。多所捕獲。而會制置使王之誥。本大將才。廼上書推拜。可使任遊擊。明年壬申。通關市。拜頗積功勞。賜金錢與將軍埒。是時拜已進遊擊秩矣。而上新卽位。套虜隱布台吉。切盡黃台吉。十失兔阿不害。着力兔。及松山賓兔。台吉。西海丙兔。台吉。後先至洪山。清水。中衛。扁都口。鋒尖墩。請幸從制置使戴才。召茂華。請以爲拜與有微勞。皆上

賜金錢有差。居一二年已卯。給諫戴光啓巡邊。請
加拜秩視副總戎。拜廼登大將軍壇。建旂鼓。甚自雄
平。明年庚辰。套虜凡九貢。海虜凡五貢矣。而大司馬
方逢時。以制置使郅光先議。請於是拜與都指揮
土文秀。皆得蒙上賞。是年順義王俺答帥其妻若
子三娘。把漢那吉。十萬騎來迎佛。因有意茶市。拜益
帥部曲西徧邊。疾力復蒙賞。明年光先又以書言。拜
有將材。可使副叅。其後壬午至己丑七八年。套虜切
盡黃台吉。卜失兔。阿不害。及松山那木太阿。不害。西
海丙兔。皆貢市。毋乏絕。而制置使高文薦。石茂華。亦

本拜及文秀功。請賞賚如初。故事。遊擊入衛。先是大司馬王崇古欲以唃拜往。而當事者皆以爲降夷不可。拜聞。廼請告以避賢者路。亡何。臺御史羅鳳翔憐其才。請得居城中。疾愈。我猶得將拜也。是時馮時可深壯當事者。得王翔旨。英廟時。常推擇恭順侯吳瑾爲大將軍。備甘肅。而翔獨以爲瑾色目人也。漢雖乏人。奈何令降虜得將軍百萬。橫行塞漠乎。久之。臺御史晉應槐果以文薦及臺御史蕭大亨請言拜疾幸久愈。可亟使也。於是大司馬梁夢龍奏以拜爲叅將。一切標兵。唯拜所部焉。有頃。靈州土軍楊

文遇等。絀叅將許汝維。一時本支被僇者凡九人。又之文遇之黨二十九人。皆逮捕亡遺。多拜與文秀力也。時壬午夏也。後六年丁亥。切盡黃台吉。不幸。又物故。而卜失兔。莊禿賴貪漢秣金帛錦絮諸什物。廼要挾我市賞毋厭。拜禦諸酋益疾。當是之時。宣大及河套諸虜。竝逐水草至南山西海。海上始蕭然苦兵矣。於是上幸從廷臣請。詔所在皆推舉大將材。而臺御史党馨。廼以唎拜及土文秀聞。後三年辛卯。上以洮河告急。廼遣司寺及六科巡九邊。邊各一人。毋拘以期。皆非故約也。是時尚寶丞周弘禴兼御史。

柱寧夏亦舉拜。及拜子承恩義子唃雲及土文秀等
拜雖請老乎。然猶口募金日碑之爲人也。居恒多蓄
蒼頭軍。至二千餘人。聲欲報國。慶曆以來。果以從征
積功勞。卽上亦有詔。詔我部紀錄者數矣。自是之
後。承恩到官管事。益慄悍不可遏。緣邊卒皆嚴事之。
弗敢犯。頃徵至青海。見雲中上谷軍。承恩大言謂是
屬亡足備緩急。我如比元昊故事。欲自立。直易易耳。
拜廼掩其口曰。毋妄言。妄言族矣。當是時。臺御史党
鑒。御將李頗嚴。尤抑折恩。禮貌遠不及曩時。諸公常
嚴青海虛糧。不得行銖兩之姦。甚至以軍法繩之恩。

由此怨聲入骨髓而會學雲與文秀亦怨聲以聲常
許推雲爲守備後弗如約而文秀亦轉遷遊擊。聲皆
遇之弗優禮故也。居亡何。蒼頭軍請冬衣布花草價
及月糧。方欲出給而承恩遂召蒼頭軍劉東陽。許朝
何應時。陳雷。白鸞等議曰。吾等欲報宿怨則盍不假
此起。有如異時。繩我等以軍法。我等謂党軍門裁削
我稟食也。於是立劉川白爲大會長。劉東陽。張文學
爲二會長期。二月十八日。並馳總戎張維忠所。鼓噪
出罵詈語。若烏能爲我主乎。已。擁衆馳備兵使石繼
芳。斬門而入。執繼芳。鉗鐐至書院。卽弑之。是時學拜

服紅袍馬首號召諸軍。非復前日阿拜也已。廼令諸軍皆披甲曰。所不如令者斬。於是諸軍竝披甲會莫復擁衆入軍門。縱火焚燒公署。馨急乃亡走匿水洞。恩等大索洞中。竟得馨。廼略橐中裝。捕家室皆盡去。其衣裸身。屏諸門外。馨既至書院。而都護蕭韶成中軍梁富國及維忠伏在馨身。請解免。不可。遂僂馨首。足異處已。謂佐馨者。實中軍陳漢李承恩也。復斬兩人。然後焚兵備糧儲。理刑。諸公署收印符。釋獄囚。肉略城中諸士庶。不可勝數。劉東陽度總戎上飛文有。如不蚤自善爲地。大兵旦莫必至也。於是復聚黨數

千人。旦日日出圍。維忠幸爲我奏。上言我等實罄
激之。又欲忠給券。冀毋死。是時通政穆來輔。便道過
里中。恩廼請於來輔。及河東備兵使隨府。詳願招安。
然以土壅城門。道路不通者久矣。後二十日。制置使
魏學曾聞倣行部至花馬池。卽以羽檄徵副總戎李
駒。因使使者張雲曉譬恩等。趨歸降。恩等弗從。第傳
令戒諸軍。毋殺略擾民。於是斬殺略者六人。以徇。後
二十三日。呼雲及文秀至。自中衛互市。亦欲反。恩見
遊擊梁琦守備馬承光竝至。心竊疑之。廼欲雲文秀
殺兩人。以示亡它腸。後有頃。秀殺琦。雲殺承光。承恩

聽然笑曰。吾得此兩人。大事可就矣。且日迎兩人入城。擊鮮爲燕饗。勞苦兩人。如將軍禮。久之。上幸從大司馬石星議。詔曰。梁琦。馬承光。不甘從逆。致被殺身。朕心憫惻。合宜先遣祭奠。并厚卹其家。以慰忠魂。已。東陽廼欲僭稱總戎。後二十四日。遂使使者至維忠所索。勅印。是時維忠僅蒼頭軍二百人。度弗與。勢孤難與爲敵。竟與之曰。吾何面目復事陛下。廼自縊而死。死矣。始維忠使使者汪度。問承恩胡亂。承恩對曰。所執執不得志。於行臺者。有二十。語多弗載。維忠廼以奏聞。上有詔。念忠素頗嚴謹。愛惜。

軍士貶秩一等。是後推擇董一奎爲總戎。而以李蕡副之。制置廼請麻貴代蕡。以貴多蒼頭軍也。詔從之。東陽旣見賊勢益熾。復使使者召韶成。及江廷輔。梁富國降。成等不得已。皆降。於是東陽好謂成曰。毋畏。吾授女都督。俾世世勿絕。後二十六日。東陽果稱總戎。吉服八擡。張旂志。鼓吹蒼頭廬兒。響呼夾道而馳。揚揚到官。已至武安王廟。焚香。因刑牛馬。祭告皇天后土曰。予小子欲以寧夏爲家。長安爲國。唯天其祐之。已廼出惡語語。上復嘆曰。有如此。可知。予請以天下授順義王。可乎。其爲不軌類如此。於是導引。

虜酋直拒潼關。是日。卽僞授承恩許朝。上文秀。寧爲左右前後副總戎。復歃血以盟。旣還。至比關高。設五座坐上。擅用勅印旂牌。軍民以次進謁。跪起若一將軍云。已授高才張學爲左右軍士。何應時爲百夫長。白鸞爲千夫長。陳雷爲旗牌操守。皆役屬朝及東陽。已授都護吳世顯爲叅將。世襲令先入靈州。志在奪扼咽喉也。於是以六千三百人入固原。以三千人入廣陽。而會制置使使者張雲至。東陽趨告制置使曰。將軍如必欲我降。請授我總戎許朝。承恩副總戎。許雲。上文秀。叅將。皆專餽寧夏。而後可許諾。不然。

者。我輩與諸虜。馳廼會城也。後二十七日。承恩果以五百人爲一軍。軍玉泉營。文秀以五百人爲一軍。軍平虜堡。是時叅將守備。備中衛者。熊國臣。備廣武者。袁尚忠。備大壩者。趙繼。皆棄城遠逃。以故賊據城堡。凡四十餘所。殺略亡。笑惟平虜蕭如勲。靈州來保。堅守不下。藉第令靈州毋守。則西事去者。固什六七矣。是時玉泉營遊擊傅桓。亦閉關嚴。弗可入。千戶陳繼武助逆。廼錙錙桓就恩。恩竟以桓繫獄。久之。熊國臣下御史逮問。後御史孫琬以檻車膠至長安。棄市。自是之後。東陽志未嘗一日不在靈州也。於是拜王虎

爲叅將張大紀爲遊擊。何安爲守備。竝馳靈州。所過
執亭長而奪之糗糧。略鳴沙州。五百戶堡。堡長吏常
大謨亦被逮。於是守備趙武。帥把總潘興。轉戰四百
戶渡。生獲劉伏僧。于正。詹仲科。常之學等八人。斬李
河首一級。奪獲大謨及官舍莊林。舳艫十八艘。時三
月初十日也。後十一日。張大紀偕趙其昭。微使使者
請副總戎李昫曰。有如大兵旦暮且至。我必開關而
待。此約已決。於是千總楊國臣渡河。大紀果開關。遂
走。我兵攻城先登。廣武悉定。後十五日。叅將吳繼祖
提兵從長樂堡直擣中衛。監門補王虎來獻。殺其黨

一十八人中衛又定。是日制置使。即使總戎劉承嗣。提定邊兵。馳橫城。而承恩東陽亦帥兵四千人。旁河而營。我河上將李殊疾力戰。遊擊梁繼祖。生獲邢河童。蔣紀。叅將崔張。生獲張小山。來保。生獲。李進章。生子。楊奉。馮教。巴汪。火力。奪獲馬牛羊二千餘頭。先是。上有詔。如能禽獻真正首惡。餘黨准與招撫。又言。不得輕縱元兇。亦不得濫及無辜。制置使廼復使都護江廷輔。千總吳計。百戶姚欽。及諸生萬錦。錦。親文秀。元舅也。並往諭秀。秀不從。廼出韶成。及陳雷。王進道。朱棟。陳尚玉。王奇等。城外。大治渠。韶成殊欲奔走。而

恐家室繫城中。恐罹禍。廼密以書致廣武營。營中許
縛成等傳靈州。頃陰使韶成往堡治糗糒。旣行至。索
園堡道逢賊。鏖戰。斬首三級。奪獲馬牛橐駝一千頭。
自是之後。恩與東賜。度非得虜騎數十萬莫可者。廼
先執長史楊耀川。繫其家室。今索慶府書及僉事
隨府。通政穆來輔。并博士弟子員揭。詳致制置使。請
罷兵。微送奉金帛。致着力兔。曰。若來。吾以花馬池至
中衛。恣女逐水草。以爲娛。着力兔果大喜。卽帥衆而
來。恩廼治盔甲數百。與虜虜一切皆披漢甲。至冠頂
則用柳杆墨花也。已。着力兔使納罕。送奉金銀及璘

緞白綾諸錦繡徵卜失兔已。徵丑氣把都炒庫兒。青把都捨刺乞漢已。徵着不刺虎禿退已。徵順義丑於。是貧鬼使使至着力兔而卜失兔賽漢住亦使使至切盡妣吉往來不乏絕切盡妣吉乃告賽漢住幸爲我止卜失兔勿往也。後十八日遊擊嚴惟忠亦提兵過河奪所據四十餘城執王虎何安繫獄斬首捕虜凡一百五十三級我兵漸入大壩玉泉營去鎮武可九十里而虜黨竟盛矣。後二十日達虜與雲文秀挑我軍我軍發流矢傷虜數人。後二十二日虜酋直走城下索酒食束賜椎牛以犒之於是制置使以其書

言有能捕斬大酋首。請比獲火落赤酋從。比獲兀慎擺腰。先是。上有詔。准照興化王事例。襲封侯伯。仍與世襲。已復有。詔必封爵世襲。哮承恩亦得捕斬劉東賜等除罪。是時。詔發糧餉三萬頃。因制置使請鹽菜復發五萬。已復有。特詔。詔太僕寺發銀二十萬。以備行軍犒賞之用。又之大司農請。帑金五十四萬。而金錢在河南四川治糗糴者。又一十八萬。是時制置使言達虜。不過切盡黃婦。賓兔婦。及着力兔宰僧。此皆我朔方市夷必未肯捨市賞之利。上亦有詔。言套虜雖入地方。未曾助逆爲亂。卽宜諭令。

出邊先是給諫章學詩王德完王建中吳之望御史
陳子貞皆後先陳大計而大司馬石星以爲賀蘭山
後水草極艱而況賓兔所居在大青山而遠竊必其
不敢深入且莊禿賴土殊若舍延綏而窺寧夏獨無
擣巢之懼乎星復言順義王忠順夫人旣俞史酋求
款方切然僅足以贖洮河之役請比俺答事約束東
西套虜勿得應賊方與定款上廼詔曰順義王若
能收俞史虜故事約束套虜出邊不使爲逆豈但爲
開貢市宜當厚加恩賚後二十五日文秀馳玉泉
許朝馳廣武兵各一千人而着力兔宰僧竟馳金貴

堡。大率控弦之士三千人。後二十七日。竝移鎮河堡。而以火器手五百人。蒼頭軍一百人。爲營漢渠迤東。王公公庄。前達虜六百人。演武塲。東陽因鹵獲城中童女。嫠婦及歌妓。以媚虜。虜迺益調甘州莊浪延綏諸部。四面而至。迺言我與唃王子本一家。唃王子。漢稱唃拜也。是時文秀亦辮髮衣胡服。與虜竝入玉泉營。後二十九日。唃雲偕吳教霸帥着力兔二千餘騎。殺略平虜堡。制置使躬提兵至下馬關。迺帥叅將蕭如薰轉戰疾力。射死唃雲。傷吳教霸。後比日復挑戰。擊破之。是日着力兔亦帥三千騎。犯花馬池。先是

上有詔。詔宣大山西。選敢死士七千人。以佐朔方之急。制置使廼復。上書速之甚急。後四月初五日。恩及東陽。以步軍推火車火砲爲營而待。李昫衝鋒。奪獲火車一百輛。追亡逐北。至湖中。賊赴水溺死者一千餘人。是時蒼頭軍高益等三人。疾力撲入城。劒斬數人。而會遊擊俞尚德兵。逗遛不進。賊竟斬高益。頃之。上有特詔。深嘉其功。已從大司馬議。賜魏學曾大紅紵絲麒麟衣一襲。銀四十兩。蕭如薰。李昫。王迥。牛秉忠。及陣亡被傷軍士。悉聽總督從重恤賞。父御史孫琬。奏昫上功莫府皆非實。其後御史李化。

龍陳勗及給諫吳鴻功皆劾昫。因言制置使過信瑋報。致動馬價銀三萬兩犒賞。於是詔謂李昫將敗爲功。罪不輕赦。下御史逮問。罷劉承嗣秩。以爲專官管事。亡何。制置使魏學曾自劾。師又招允。上曰。學曾忠義任事。功已垂成。還與葉夢熊同心僂力。速勦叛逆。人言不必爲慮。昫竟免逮。後初六日。許朝土文秀。繫慶王及穆通政。隨僉事至東城土樓。傳言李昫暫罷兵。已復囚繫甕城關王廟。先是楊躍川微言劉東陽授意。慶王奏班師。制置使誠郵傳譏察其嚴頃。副使李承志執使者三人。得其章。果如躍川言。

也。後初八日，承恩坐南關樓上，大呼都護李鯤至城下。於是文秀以誥命承恩以勘合並擲城下。曰：吾等自是不爲漢官矣。承恩母施涕泣。兒子休矣。恩曰：女頭頸當并砍之。已。廼告邊吏殺院司者。實劉川白、張清、沈彪等四人願以出獻，請罷兵。是時俞遊擊兵以糗糒不具，鞅鞅多怨望，遂假此休士馬，制置使卽使叅將鄧鳳往靈州，治雲梯攻城。城中方日夜擊刀斗。誠門者弗得容它使往來。後十二日，恩等欲汗磯慶憲王正妃方事覺，方以王世子閔匿土窖中，被驚覺逝。恩等竟以淫汗逼李氏等死者九人。是時大

司馬石星以爲執。宗室及鄉士大夫以爲質。此不
過故緩我師。以俟秋高馬肥。於虜便。昔太公伏暴虎
高分羹。卒使頂羽計阻。太公獲全。而漢終有天下。奈
何過中彼計已甚乎。已承恩迎着力。兎娘子入城已
迎酋長至北樓。歃血以盟。已奉金帛及朔方輿地獻
吉囊。莊禿賴已。以讖語誑順義王。搆力克曰。天下事
大定矣。君王自爲之。先是給諫呂兆熊奏弘鑰舉黨
馨事。其後鑰亦上書深辯其誣。竟左遷。居亡何。給
諫王德完乃舉侍郎顧思謙。都御史孫洵。叅政張世
烈。于達真兵備部永春。劉葵。袁弘德。按察使李士達。

及李林。而御史梅國禎。余杰。則舉寧遠伯李成梁。都督李如松。及史宸。兵備蔡可賢。主事趙夢麟。因請文臣一人監軍。以嘉靖中倭倣常轉職方主事唐順之爲太僕少卿。協贊軍事故也。執金吾張光烈。則舉鄭洛。李成梁。郎中王謙。經歷劉黃裳。兵憲梁雲龍。及副總戎李如栢。叅將王孝敢。遊擊李如梅。其後上竟徵李成梁。而以如松爲總戎。頃御史龔文選。謂以如松往。誠是。獨德完復。奏宜酌議擇用。後頃國禎上書。願與成梁馳赴寧夏。同心討賊。以釋群疑。而是時恩等愈詭求招安。說者或以爲便。而國禎及經歷

劉黃裳可承周弘綸廼深以爲慮於是國禎竟以書奏大略言賊勢旣合必不坐守孤城非近據寧州則遠襲潼關上幸有詔詔國禎同李如松監軍并紀錄頃國禎復上書其一請假以威令如古者遣將以所佩刀賜之以誅將士之不用命者其二請得我服臨陣以身督戰其三請錄凡有謀略勇敢立功自效者其四請李成梁蚤赴軍中資其調度上曰御史職司監察凡事只與督撫將領計議而行已詔轉朱正色爲御史右丞撫寧夏是時制置使知靈州重鎮廼徵蘭靖榆林兵動七八百或千餘里而所

治丹筏。又猝難辦。廼止壁花馬池。軍至卽移靈州。靈州東有橫城。西有鳴沙洲。濱河。一犇可渡。故賊不能不留意。以在河南。與寧夏相對也。於是以總戎李昫爲一軍。軍靈州。遊擊趙武爲一軍。軍鳴沙洲。而又恐賊東渡。廼以一軍軍橫城。至備固原。則叅政馬鳴鑾下馬關。則副使楊時寧居亡何。大司馬石星則又慮賊由下馬關窺固原。或由靈州窺慶陽。廼請臺御史沈思考從關中移下馬關。以爲聲援。因欲移咨保定山西河南諸臺。嚴爲備。潼關後御史孫玠亦請徵淮浙及河南兵。以援西安潼關。詔皆從之。而給諫李

養質。又上書欲守慶陽。以爲必慶陽紅德不可守。而後退而守潼關也。而是時按察使李春光石櫃寨敗。使劉光國皆請告。御史劉芳譽上書大略言。道臣紛紛求去。有司寥寥乏人。頃進士馮應京試高等。迺請降資。除授邊方。識者以爲有請纓之志矣。居有頃。甘肅臺御史葉夢熊亦以書至。詔稱夢熊慷慨以殺賊自任。忠義可嘉。着以原官提兵前去該鎮督同魏學曾。朱正色。一心併力。刻期滅賊。於是延綏遊擊姜顯。蕭如蕙等。期十七日往擊寧夏。而會虜酋東自安定堡西自玉泉營。擾我師。我師以二十日進兵。後

二十三日始掘外城填塞濠塹計欲以雲梯攻城賊
廼出城挑我兵我兵傷者以百數承恩益乘勝帥虜
酋二千餘騎東擾橫城焚蕩焚略畜產亡笑已浮黃
河略秦霸堡東賜詞得延綏榆林兵西征廼徵告黃
台吉婦卽縱男捨達大及姪火落赤鐵雷以穹廬屯
舊安邊磚井堡殺略人畜亡笑於是大司馬恐屬叛
賊詐爲虜狀虛張聲勢廼移制置使務辨譎詐毋爲
所欺因以札付二百屬制置使訪誅納有能禽拜及
承恩者封伯爵也世襲銀五千兩東賜及許朝文秀
自授都指揮同知諸酋自相捕斬得除罪論賞是時

葉司馬以羽檄徵貴陽苗兵一千餘人而播吏楊應龍亦請提兵往。後報罷。給諫許子偉請募蒼頭軍及治火器。於是乎戰陣之具無不畢具也。後二十四日。我兵誘承恩出戰。殊疾力。斬首二級。後二十六日。復挑戰。諸賊頗股栗。不敢近。我兵攻城。城上矢發如雨。多所損折。後二十七日。總戎麻貴。牛秉忠。劉承嗣。廼選百金之士七千人。結爲四營。從西北攻。又二千四百從東北角夾攻。賊亦以徒步五千人。人各執挨牌。門扇遮欄在前。輕騎在後。揚揚衝突而來。殊類虓虎。我兵自未至申。疾力戰。破之。擊傷亡笑。斬首一十六

級奪獲門扇挨牌四百九十有奇。而東陽及承恩亦
鹵獲我糗糧二百餘車。我兵逗遛中道者。凡一千七
百餘人。是時制置使自花馬池還靈州。被圍。賴許叅
將至得解。後二十九日。麻貴牛秉忠及李昫馬孔英
期營兵四面竝至。是夜夜半。乘大風縱火。砲鳴如雷。
竝以雲梯攻城。東陽先已治滾木。礮石鎗砲待我兵。
我兵欲避矢石。猶之逃雨也。無之而非是矣。賊益擲
柴束火藥燃燒。擊死兵士以千數。會天明。城不及攻。
承恩廼出賊阻絕我饒道。道上車戶被僇者凡一十
六人。略畜產亡美。是日董一奎欲東復橫城。東南復

諸村堡以通饒道爲急。於是朱正色躬提兵度河督戰。而制置使亦發四使。一使使切盡妣吉。一使使者力兔。一使使賓兔妻。一使使吉囊諭勿助虜。頃延綏諸虜千餘人。竟逐水草至三塔兒墩。而承恩久惑於術士言。已僭稱一字混天王。因大書榜文。聲言卽日與諸虜擊慶陽。奪會城。上於是恐制置使威令不肅。廼賜劔一口。曰。敢不如命者。劔斬以徇。是時尤惓與諭兩臺同心協謀。欽哉。後五月初二日。臺御史朱正色調總戎董一奎。張傑由橫城度河護運至寧夏。於是叅政楊時寧。副使蔡可賢。通判李崇德。犒軍。

軍二兩皆從。上命也。頃臺御史見虜中火砲三眼鎗皆我中國長技。上書深言國威弗振。是後葉夢熊亦以三軍。卽糗糧芻茭甚不足。請借甘鎮糧料及糴本七萬九千九百有奇。先是懷慶兵赴寧夏臺御史沈思孝請增兵餉。頃大司農楊俊民及大司馬石星議咨漕使者李戴主事楊初東動濟邊銀五萬兩。詔皆從之。後初六日有星大如斗從東南隕。四小星相隨屬皆紅綠色。尾長二三丈。御史劉芳譽以星變陳兵食大計。後初七日一奎及麻貴秉忠見爲西關可擊。微使士卒採柳梢蒲草及土修墊馬道事。

覺恩偕東陽發鳴鏑。乘忠右股中流矢幾死。三軍死者凡二百餘人。恩復帥虜酋從唐渠梁上攻營。一奎以火砲擊傷二人。恩亦以火藥焚燒柴草。後初十日。三軍皆還李祥河西寨。魏信堡休士。是時承恩東陽計欲執張傑迺詳請歸降。有頃許朝使使者迎傑入城。傑迺單騎往。既至。果就繫請室也。而會着宰銀定把都諸酋亦款塞。朝恐虜受我賞賜。率有它腸。迺先以重賄誘虜。虜因告邊吏曰。阿王與唃拜有夙昔之盟。必先撫拜而後阿王可就也。於是虜以數萬騎犯我南道。而唃拜亦以五百騎圍平虜堡。從虜命也。制

置使乃帥蕭如蕙翼而擊之斬首捕虜六十餘級。是時御史蔣春芳止書陳三事。事多不載。大略欲厚市賞以諭虜。勿與賊合。投反間。激忠義。因守一月。食盡必斃。非然則以龍虎將軍及五萬金許虜。令誅賊。非然則決黃水以灌之。不崇朝可破也。後大司馬石星及大司農楊俊民以爲議是而給諫侯慶遠則以爲臨七鎮之雄。臨一隅之草寇。乃令虜立功而取直於我。適足取輕。給諫劉弘寶又以爲張蓋剪誣氣明。以逆而說者乃以虜王未必知也。自是之後。給諫劉道隆韓學信以爲兵事貴神密。宜慎章奏。於是上

有詔凡屬軍務。郵傳不得馳報。時有聞者。罕而。後六月。夢熊亦至靈州。後十九日。徵營兵及苗兵。而會臺御史常居敬進浙兵一千人。糗糒皆一切自。上有詔嘉居敬助兵討賊。足見忠義。卽令調赴寧夏。後頃御史傅好禮謂浙去寧可五千里。必在三月之外。而後可達。而況浙兵素稱驕悍。所恃器械。非復先則烏銃。不如邊士之堅甲利兵。強弓勁弩也。罷之便而大司馬石星請以浙兵赴會城。以臺御史沈思孝請兵故也。後頃復請赴寧夏。詔從之。於是分爲五

軍。置一臺。文其南。中集忠文士。東。李向文士。西。則

嗣攻其北。麻貴攻其中。旦日並馳城下。賊虜皆出戰。將軍令曰。賊虜敢迎敵者斬。塹之。噓拜。劉東陽偕虜酋果拒關迎敵。貴鏖戰。賊乃大敗。生獲二百一十八人。奪獲橐駝器械。我兵復以火箭燒賊樓。樓頭火起。噓拜幸以水滅之。已掘城脚五洞。復擊北關。亦以火箭火藥。藥燃。城樓砲石從內擊。傷營兵亡笑。後二十三日。梅國禎及李如松提宣大山西遼東兵五合六聚而至。是時四鎮兵獨制置使主之。而如松則專制中二邊兵也。後二十四日。以布袋三萬盛土堆集上城。城上擊石矢及吳顯直兵士等。甚多。後二十五

日。國禎帥都護李如樟。夜半遣蒼頭軍。以雲梯。踰上南城。城上柴草。裹以硝黃。炮墜下。焚燒雲梯。蒼頭軍盡墜。多所損傷。是日諸賊七人。復從空下城。乃索箭枝鉛子。遊擊達雲斬二人。它皆緣繩而上。後二十六日。遊擊龔子敬。立功劉天俸。提苗兵攻南關。火炮焚燒懸樓。於是董一奎擊城門。賊亦以鉛子中。叅將王鐵塊面。是時如松廼乘勢。欲提兵擁上城。城上箭砲並發。發多中。擊傷兵士。復以炮焚雲梯。雲梯中斷。蒼頭軍大墜地。傾跌多傷。毀面貌及手足者。已窺我兵攻罷會食。縋下奪梯牌。益乘風縱火。焚燒仇公。

祠。三清觀。於是遊擊吳顯追逐。斬首七級。奪獲弓矢。刀鎗。是日復攻南關。先使士卒掘護門。實土焚門間。哮拜。與承恩東陽。亦從門上掘孔。以水滅火。火熄。卽以鎗砲轟石。擊諸軍。諸軍指揮趙承光。武生張遐齡。百戶姚欽。霸城中久。殊欲爲內間。迺與總戎葛臣約。是夜夜半。四面竝舉。焚火。火起。城下兵趨上。於是臣樵樓。承光南。欽西南。而樵樓火過蚤。南火弗起。城中果鼓噪。大呼殺賊。欽亟使遐齡縋城。呼城下兵。城下兵行未至中道。邏使馳旂牌至。迺鄧鑑承光而去。而欽及百戶方正跳驅下城。言城中無不人人皆自以。

爲欲殲滅賊也。於是賊盡殺同事戚卿等五十餘人。懸首城上。許朝因欲監門開小南門。遂走。見門外兵衛甚設。遂返。頗有懼心矣。後二十九日。承嗣攻北關。穿鑿地道。東陽衝鋒。是時臺御史朱正色。御史梅國禎。躬至矢石間。如松以鳴鏑攻射。射傷甚多。東陽亦傷松蒼頭軍一人。自是之後。賊益纓城而守。日趨於徂詐。專以矢石火器乘人所不暇避。我士卒被矢石死傷者。凡七千餘人。臺御史葉夢熊。廼以書奏。因言唐用兵至四十六萬。今征西之兵。僅足三萬。旣用誅叛。又用禦虜。應接之不暇。於是詔曰。督撫官躬

率將領攻城。忠勇可尚。還著乘勢奮勦。毋得懈緩。軍士死亡者。逐一查明。重行恤賚。先是虜從嘉峪關往來下古城。岔山。後六月初三日。副總戎楊濬行捕至夜漢。斬首二十七級。奪獲橐駝一十三頭。追亡逐北。至天倉。斬首四十三級。奪獲馬四十騎。橐駝十三頭。於是法當撫賞。而楊時寧懼霜露之恙。主事趙夢麟請往。既行至中道。墜馬。後時寧竟往也。後初四日。酋長着力兔打正。使夷使我兒流來請賞。打正卽宰僧也。而銀錠把都兒台吉。吉囊小酋。亦使刺八五克器等至橫城。索重賞。比著罕。制置使皆許之。是日許朝。

恐着力兔既受賞。黨與日落。迺好謂着力兔曰。幸爲我主招撫事。有如招撫我。可保亡恙。然後若往受賞也。先是副總戎蕭如薰直擣着力兔巢。略人畜甚多。着首迺使夷使三十餘人至城下。因告張傑。我以蕭總戎奪我人畜。榆林又殺明安故。我是以與哱拜有寧夏之盟。今必欲招安拜。先與拜鐵券。我令拜出高登等就漢也。傑曰。若與明安自負漢。漢何負明安與若乎。頃許朝果欲以高登。劉時三。張應隆。張廷宰。陳邦禮。係縲致軍門。而會臺御史朱正色往靈州中止。張傑業已使指揮趙繼祖。蒼頭軍丁俊請招撫事。數

數然也。是時正色謂此必非實意。而夢熊亦謂所出非渠率。終不足辦事。廼令治鷹架。雲梯。獨木梯。以示必戰意。然問諸往來者。城中糧食久殫竭。而銳氣亦甚消耗矣。制置使於是使河西蔡可賢。及總戎麻貴主招撫事。後初九日。可賢既行至李祥堡。許朝果以篋輿致高登等靈州。因請朱撫臺度河。朝廼衿甲面縛獻常達子。史得興。王二。張應隆。曰。殺臺司者。實四酋也。制置使魏學曾廼以奏聞。事下大司馬問狀。覆請。詔謂招安事不足輕信。還與葉夢熊。朱正色同心定議。頃之。給諫喬胤。劉道隆。吳禮嘉。王建中。朱

維藩御史張應揚。章守誠。主政周之鼎。皆後先言。安非笑。我購噓酋頭。不惜拜爵萬戶侯。奈何執區區史得興等以請。么麼固何當乎。是後。上有特詔。詔魏學曾嚴督將領。尅期攻城。以益前愆。先是。噓拜不獻渠魁。祇提兵五百人。與着酋報平虜之役。制置使固已久悉其姦矣。傑復言。賊得葉撫臺諭虜酋檄。益無降意。制置使於是。以檄盡發其姦。曰。所不俸以斧鉞臨城。徒以吾城中民耳。今豈顧問哉。拜始惴惴然。惶懼。自知妄愚有死罪。度漢兵必不我寬假也。迺微使養子克力益往調着力兔。如松訶知其狀。即使裨

將李寧追逐。斬克力益等首二十九級。奪獲印符令旂。着力兔令箭。及橐駝兵器。後七月初二日。許朝躬至南關。與贊畫趙夢麟。及總戎董一奎語。而會僉事隨府。携蒼頭張興。從城上跳躍而下。城上發火砲石。矢不可敵。卽以賊四人從洞中縋下。復執府上城。反接繫獄。賊廼以銀四錠。紅段四純。勞四人。四人揚揚示城下。甚自誇詡也。久之。臺御史朱正色。上書言隨府穆來輔。不甘從逆。囚繫北甕城。今四月矣。而同知宋珂。通判王尚賓。廼至爲賊治獄訟簿書。宜優叙府等。以魏珂與尚賓。詔曰。被賊拘禁。有何忠義優

叙後初三日。土文秀復使吳繼韜誘虜。千總王世傑
追逐。斬首捕虜一十五級。奪獲印符令旂橐駝。後初
七日。漢兵大圍寧夏城。承恩廼獻故司臺家室。復許
開門獻南關。益詭求招安。以待虜救。先是東陽承恩
與着力兔送奉黃金二十兩。銀五百兩。及蟒衣錦繡
諸什物。請上失兔曰。事急。幸佐我。狗靈州。兵到。先止
壁下馬關。以阻絕漢饌道也。後頃東虜莊禿賴明愛。
阿克亦與上失兔合營。部落至三萬。果先使土昧合
樂赤。鐵雷等。犯定邊。已。犯岩子柳門羊圈兒諸山。已。
犯張春井。小鹽池。制置使急使叅將來保。王國柱往。

既行至興武。則虜已馳沙湃矣。於是遊擊龔子敬提苗兵一千餘人追亡逐北至沙湃。頃虜一入自沙湃。一入自沙梁。漸增至五萬人。聲欲奪我清平慶陽。逢苗兵及子敬。戴君寵、龔惟試等殺慘殆無類。鮮有匹馬半筴以還者矣。制置使乃遣總戎董一元、麻貴往。於是貴直擣石溝。斬首捕虜凡五十八級。一元直擣土味巢。斬首捕虜凡一百三十餘級。奪獲畜產皆亡。箕諸虜廼嘆曰。我徒以呼酋之故。廼至此。顧不勞耶。皆逐逃而去。承恩東陽。即使使者追之。因告酋長曰。若受我金幣已重。今圍城而不相救。安在其爲同好。

也。我城中期若至。必舉燹火爲號。若望見燹火起。幸擁控弦之士數十萬。貫弓執矢而來也。虜幸不至。事聞。上大怒。謂督撫受他欺詐。惑于招安。蕭如薰孤城抗賊。出兵搗巢。屢效忠勇。虜賊前去報仇。不速遣兵救護。顯是忌功。後御史訪誅訥。賜魏學曾及延綏臺御史賈仁元以下爵賞有差。而莊浪苗兵亦獲重賞。奉明詔也。是時大司馬議欲以經略大臣賞二十萬金撫虜。而給諫許弘綱羅棟深以爲不可。自此譚制置使者接踵至矣。上初假學曾以便宜。又幸賜之以劍。有文皇帝遇趙毅風而況麻貴以

適戍用。董一奎以開伍用。李如松以告老用。劉承嗣以戴罪用。公卿間無不人人叩陛下。善於使過。以故給諫李養質。張輔之。許子偉。御史方元彥。主政張棟。讓書再至。上幸從大司馬議。廼予魏學曾告。而以葉夢熊轉遷右司馬兼御史右丞。賜劔亦如之。於是制置使新授事。學曾猶及與臺御史朱正色。御史梅國禎大會庭中。決意欲屠城。始發難時。大司馬石星以爲寧夏旁賀蘭山三面阻黃河。大壩之水視西塔高數丈。有如夜半飛筏而渡。我以樓船將軍。據大壩決水以灌城。城不須史破也。後御史陳遇文給

諫陳洪烈。李養質。許弘綱。諸所條對。皆至周悉。多濡載。是時國禎。度寧夏地勢西南爲唐渠。東爲紅花渠。形如釜底。惟北面最卑下。廼募民夫築堤至一千二百餘丈。賊已在釜中矣。而又下令諸堡有積聚糗糧者。增值予之。如能自轉軍中。悉予所轉費。有事則賊不得阻絕我饒道。及事平而饒幸有餘。盡以所有餘佐貧民之急。賊聞斯事。自知爲釜中魚。皆惶懼。歌吟震天地。而會石憲副有弟曰繼善。自城中來。極知人馬多餓死甚危急。言初焚南關時。呼酋幾就僂。而以救兵不至。得緩須臾毋死。又言姚欽舉火爲內應。常

遣張遐齡走遊擊陳守義營。守義不答。皆自失其機。如此。是時通事馬世傑、德勝、阿卜失戶。皆受賊金錢。蟒段。陰爲耳目。前是阿卜失戶往來河招虜李如松。遣裨將行捕。斬首二級。阿卜失戶赴黃河溺死。填豐登堡。奪獲王應吉。搜有着力兔夷書一紙已。又捕獲楊奉。鄧天受。趙進文。國禎。廼以書奏。甚言陳守義張詩法當斬。詩亦都護也。固原軍趙思義爲賊所逮。詩皆周聞。至賊自言而後始覺也。事下大司馬覆奏。上令總兵官二品以上有抗違姤功。聽制置使馳奏。而後論治。其下。壹決於外。不從中覆也。於是以陳守

義張詩梟斬軍中。遣執金吾逮魏學曾。上決意從

水攻之策矣。後十八日。國禎銳意決大壩。水流至八月初一日。城外水深八九尺。是夜拜及承恩東賜。遣賊以小艇赴壩。掘掘以求洩水。如公及承嗣斬首一十四級。生得一人。爲漢言城中乏穀。士卒盡食馬。馬餘五百騎。民亦食樹皮敗靴。寧至死弗亂。以故賊弗得乘隙以爲變。後初二日。城東西崩一百餘丈。都護吳世顯叅將來保所治堤亦各崩二十丈。是時學曾猶待罪行間。廼劒斬吳世顯以徇。三軍來保以靈州功得解免。於是魏學曾廼以書聞。以上有詔五日。

一馳奏也。後初六日，承恩東賜，遣賊四百人，鼓棹至望軍臺。舊將臺以火砲擊漢軍，令不得補堤。學曾急使麻貴、王通等提隊長劉計、丹蒼頭軍苗世祿趨臺先登。諸軍接踵奪據將臺，生獲杜尚志，斬首四級。餘黨奔入城已。又遣賊七百人，鼓棹至東岳廟，總戎牛秉忠帥裨將李秉德提兵勇劉九等衝鋒奪獲挨牌，并鉛子千餘。後初七日，又遣賊五百人奪廟基及修東城。俞尚德鏖戰多所斬獲。我官兵死傷者凡八十九人。是日饑民擁賊求招安。賊廼紿言曰：「朝廷幸哀憐吾等，發鐵券，久欲待吾等以不死。」將軍廼匿而

不以告。何也。後十二日。梅國禎以檄布告諸賊。大略謂許朝等。必欲請招安。則先以饑民若干人。具報縣官。爲諸饑民治錢穀。檄到三日。開關迎大兵入。施賑。毋畏有如二三。必疑畏。則以饑民赴河西寨。就賑。亦惟女等所便也。低徊者二日。竟弗至。於是國禎大怒。至髮上指冠曰。吾特許若。以窺若誠否。若豈以爲我幸中若計耶。是時學曾旦莫露香。爲百姓請命於皇天上帝。老臣願以餘生贖一城生命。後十六日。學曾復使千把總潘宗劉祿。詳稱鐵券已至。誘賊出迎。計縛賊。夢熊亦欲遣標兵六百人。捕伏間道。如

學曾約。後賊覺。廼止。後十七日。學曾遂解綬南還。軍民扶持車轂走百餘里。遮道弗得前。後數日。會有詔逮問大司馬石星。及給諫許弘綱。太常王汝訓。皆請免逮。勿深誅。上弗從。後給諫喬胤復以書奏甚懇切。語在 奏疏。事下九卿科道會議。於是請予告回籍。往一切爵賞。盡爲收奪。及覆胤所請。省海防。罷御史募兵。上幸從。罷御史募兵議。它一切如故。後臺御史朱正色。及御史李時華。給諫王建中。主事龐應復。言學曾事。宜在見赦。皆留中。後總督李如松疏下大司馬。而學曾亦自以書訟者再矣。上終

弗從。謂始聞變亂。不趨赴勦除也。廷議大都念學曾
守靈州功。而況曩時吉囊之戰。莊禿賴明安之戰。秋
毫皆學曾力也。是時城中。或饑餓死。或饑餓欲死。而
弗卽得死。而以爲不如死。而竟自縊而死者。恩與東
陽。輒皆欲言疾病死。不欲漢明知饑餓死。死人實如
亂麻也。後十八日。賊復使劉元。朱山。閻登科。黃虎。往
招虜。行至沙城墩。來保王通等。行捕斬首二級。搜獲
指揮僉事。着力兔書。書大略言。我會襖兒都司。及山
岩松山弟若姪。可得虜騎三萬。我衆以是月二十七
日。由平虜堡渡河。奪廼河上糗糧也。是日復決大壩。

甚泛溢。承恩東陽。從城上鳴烟砲。暗號以俟虜衝突。
着力兎果從橫城。奪舳艫。凌轢邊吏。甚驚無道。於是
察使馬鳴鑾及叅政張季恩。副使蔡可賢。廼帥通
判李崇德。轉穀軍中。後二十一日。着力兎先以八百
騎入鎮北堡。已又擁衆萬餘入李綱堡。渡河諸道竝
進捕殺吏卒。毆侵邊郡。諸酋於是大言曰。阿王欲出
承恩踐割土之約。我衆由此逐牧寧夏矣。制置使廼
使李如松。勒兵一萬人。副將李寧一千人。後二十三
日。行捕至張亮堡。道逢虜騎五千。大戰二十合。射傷
虜馬亡算。後與麻貴軍合戰。虜敗走。追亡逐北至賀

蘭山虜盡走出塞。我兵先後斬首捕虜凡一百三十
二級。生獲二人。奪獲橐駝馬牛羊一千五百有奇。於
是葉夢熊朱正色梅國禎並以捷聞。後大司馬石
星覆奏。詔曰。寧夏退虜。斬獲數多。各官協力奮勇。
宜先加賞賚。以示激勵。賜葉夢熊金六十兩。朱正
色李如松金五十兩。表裏皆四之。梅國禎麻貴王通
金四十兩。表裏二之。李寧馬孔英趙夢麟李如楫馬
鳴鑾蔡可賢張季恩金三十兩。表裏二之。後九月初
三日。叅將楊文提浙兵一千至。已苗兵及蒼浪兵至。
已酉。寧王兵及鄖陽標兵至。制置使於是出二萬金

布告營中。有能攻城先登者。予萬金。先是洮河告急。以劉承嗣往洮氓。董二奎往固原。大司馬頗以臨敵。易將爲慮。而當是時。諸將又皆不相能。四鎮自爲一軍。苗兵自爲一軍。宣太山西遼東自爲一軍。而督撫監軍亦各自爲部。大司馬於是請統於一。而制置使司調度監軍司糾察。大意欲無相侵越。至三軍則尤不宜分部而遣也。而大司馬亦自言。曩諸葛亮出師無功。請貶爲右將軍。臣星願貶一階。或削宮保。以爲調度不效者之戒。詔謂本兵調度勤勞。不必退讓。它皆如所奏。後初七日。水浸北關。城崩。後初八日。

國禎使使者曉譬拜。及承恩以禍福趨悔過。竟不報。後初九日。南關居民內變。先斬監門高天壽。吳保。急使俞仲科。袁佐。跳驅下城。召漢兵。於是臺御史詳調船筏。擊北關。承恩許朝果趨北關。鏖戰而臺御史御史急帥李如松。蕭如薰。以雲梯攀緣而上。擊南關。是時虜王那害及姓達子亦帥僞把總耿世榮。胡進忠。僞隊長張廷弼。馮佐。薛臣。孫滿倉。僞總旗夏興。悉佐戰。我軍殊疾力。梟斬亡遺。城中諸父老子弟竝匍匐焚香。列馬首。跪起迎曰。久不見漢官威儀。廼爲逆首所褻也。頃制置使入南關。勞苦百姓。極知若等久窘。

困無策。於是問其家六口以上者。予一金。它皆五金。百姓皆以爲將軍親已。爭獻牛酒犒三軍。曰。豈謂諸軍無有。亦謂津梁之上。無使饑渴也。叩頭如蒙更生。承恩東陽。見爲南關已奪。計畫無所復之。乃急使張傑告制置使曰。幸爲我謝將軍。恩貸我。我纍囚。夫豈不知有死罪。惟將軍仁德赦前事。毋遽以我論至死。制置使陽許諾。益下令增堤。因授策浙兵。以回龍火箭焚南城。已用。臨衝擊大城。後十四日。制置使及兩臺令關民李登執免罪牌行間。令諸偷自相捕斬得除罪。後十六日。竝擊大城。城中父老子弟焚香郊迎。

遮道如南關曰。奚爲后我東陽頓足嘆曰。我等遂至是耶。誠不如自殺。於是祥爲風疾殺土文秀。曰。好頭頸。母令他人砍之已。承恩畢。邪氣走南關。殺許朝。及其子許萬鐘已。畢邪氣走北關。殺東陽。皆懸首城上。是日卽以大城奉獻。於是李如松。蕭如薰。李如樟。楊文登。天城諸酋。猶持滿傳矢外鄉。而哮拜。及畢邪氣。吳傲。八石棟等。奮髯抵几曰。走若等。豈猶有雄心耶。由此大城悉定。如樟卽馳北樓。搜獲寧夏關防。及征西將軍印各一顆。制置使廼下令裨將曰。旦日不以哮酋頭至者。以賜劒決之。後十七日。承恩馳馬走

南關逢楊文。文執之。於是李如松及蕭如薰卽提兵圍李拜私第。拜急。帥蒼頭軍盡披甲上屋走。如松止曰。勿走。女降。吾給女令箭。得不死。蒼頭軍果棄甲請降。拜尚與一二虜酋疾戰。如樟廼撲入。舉火。火攻。斬拜首。生得拜中子承寵。義子李洪大及秀弟。士文德。何應時。陳雷。白鸞。陳繼武。是時穆來輔亦帥蒼頭軍。穆息殺杜虎刺赤。及白鶴。於是制置使卽以紅黃爲旂志。上書九月十六日。平定寧夏捷至。上大喜。廼詔大學士曰。覽卿等及本部所奏捷音。皆賴上天默祐。祖宗隆庇。文武同心。將士僉力。乃成厥

功。朕甚嘉悅。吉日。親御午門受賀。已復有。詔免

學曾官爲民。令回籍。頃之。制置使使守備使劉弘業。
篋輿膠。王文德等致長安。於是當承恩等凌遲。承寵
及唃洪大。王文德皆梟斬長安市。東賜妻趙及子年
哇。洗哇。許朝媳何。及子長孫漢哇。孫女仰哇。唃雲子
繼勳。繼業。文秀子希衛。及承恩家室。皆沒入縣官爲
奴婢。嗣是之後。制置使臺御史御史皆。奏捷論功
次。其中懋懋魏學曾守靈州。使賊不得據關中。復諸
堡。賊不得據境內。有大功。大司馬石星。奏亦如之。
書不下。頃。給諫曹大威。李汝華。劾。奏穆來輔隨府

上遣執金吾逮問。竟通邊後。頗大司徒請宣。秦獻
俘。詔告天下。及慰問。慶府褒興王妃。上皆從
之。於是御門獻俘。特降。明詔布告天下。卽發大僕
銀二十萬。勞苦軍士。復寧夏今年租稅。制置使亦爲
露布。自是之後。彰德同知帥機獻頌。上幸以附史
館。給諫曲遷喬。廼以爲不可也。其後大司馬請訪誅
納。上著爲令。令查勘各邊功次。不得出一月之外。
後月餘。御史劉芳譽奏勘。上幸從大司馬所覆議。
轉遷葉夢熊。御史右丞廕一子爲正千戶。世襲。賜
金一百兩。表裏四之。朱正色副御史右丞廕一子爲

正百戶。實授梅國禎。轉京堂。視四品秩。候遷。邊都御史。廕一子爲正百戶。實授。賜金錢幣帛有差。李如松。轉右都督。廕一子爲指揮同知。世襲。又以征倭積功勞。加太子太保。賜金錢幣帛。視制置使。蕭如薰。廕子視如松。皆任執金吾。賜金八十兩。表裏亦如之。蕭大亨。常居敬。以下。賜金錢幣帛有差。沈思孝。起用。楊時寧。馬鳴鑾。劉光國。遷秩一級。候補都御史。麻承詔。嚴惟忠。鄧鳳。劉天俸。皆贖罪。轉都指揮使。世襲。則周國柱。李登。王英。正千戶。世襲。則石棟。胡成。文而已。麻貴。劉承嗣。李如樟等。皆。賜金錢有差。魏學。

曾准以原官致仕。加大司馬。石星太子太保。廕一子錦衣衛正千戶。賜金八十兩。表裏四之。徐元太趙叅魯。宋應昌。賜金三十兩。表裏二之。賜郎中金皆二十兩。葛臣來三聘。趙叅。金十兩。賜楊俊民等金十兩。獨許弘綱。金二十兩。遇京堂推用。以弘綱所刺譏。皆中當時之病也。後許弘綱請辭。上從之。始議寧夏功成。有封爵。後以廷議功罪成于二人。上有詔免行。待後有戡亂大功。與封典昭合者。仍申明格例舉行。勿使朝廷失信。以孤報効之意。是時延安貢生命方策。自陳有大功。於是給諫趙完壁請幽

隱當察而國禎乃上言功賞不當大失人心。上
有詔下大司馬問國禎何人虧枉何人冒濫後給諫
張輔之奏亦如上意是時武生余丁亦有授千百
戶及指揮者甚至軍士亦賜冠帶策以故大鞅鞅
不得志頃大司馬石星復奏董正誼張澤王世祿
等功詔曰虧枉不多有何顯弊隱情梅國禎原不
自己爭功卿星當使人已兩安不必過爲推讓於是
贈龔子敬都督僉事廕一子正千戶世襲令朔方奉
祠勿絕已旌表死節趙承先母李妻李陳縉妻梅熊
彥吉妻林楊湛母朱楊采妻范自縉母王王明里妻

王及諸生蔣三重儒士郭自謙李友貴而會是時蕭如薰妻楊殺啁雲賜誥命四方皆傳以爲美談先是上有詔詔各邊總督等官務要愛惜軍士克足糧餉又言總兵等官俸糧寢薄養廉無具責以養廉禦虜勢所不能於是制置使上善後八議語在奏疏上從之而會切盡妣吉帥酋長着力兎宰僧莊禿賴鐵雷合落赤等從花馬關款塞請開市而着力兎宰僧又言願立奇功於是葉夢熊復以書請後御史李楠深以爲不可許先是上失兎明愛款神木塞乞市給諫許弘綱以爲宜許明上以離其黨嚴拒宰着以

折其心。上有詔。勒令盡獻隱匿叛人。立功自贖。方許開貢。後宰僧果獻逆丁扯布李敖壩已。獻通事馬世傑。張敖壩。而臺御史周光鎬。又往捕招柰。柰亦弒麻貴蒼頭軍也。始着力兔以八百騎橫行鎮北堡。曰。吾以出哮拜踐割土之約。今如何哉。

讚曰

以余所聞韓琦范仲淹功至高。西寧之事。豈不累年乎。今朔方卽西寧矣。哮首之變。廼不數月而旋捷。猶歟盛哉。語曰。一人守險。千人莫過。余觀守靈州事。則未嘗不壯其識。及聞決大壩水。哮首遂至。幾無類。此

又與攻智伯事何異傳不云乎非我族類其心必異然則金日磾之事何可執以爲辭也

李拜亭承恩

終